

# NTANGO YA KOSANGANA

## PE ELEMBO NA YANGO



Mbote. Ezali litomba mpo na kozala awa na mpokwa oyo pe kotelema esika oyo.

<sup>2</sup> Na ntongo oyo, ezalaki ngai koya, na nzela. . . Nakendeki kobondela, mpo na kotalela Nkolo. Pe ezalaki ngai koya, na nzela, nafungolaki radio mpo na koyoka mo—motei moko, Ndeko Smith, ndeko ya loposo moindo, (bino nyonso pe boyokaki ye na ntongo oyo? Ata moko na bino te?) azalaka kuna, nakanisi, na Ohio. Moto moko alobelaki ngai na ntina na mateya na ye, pe alobaki: “Osengeli koyoka ye, ndenge wana.”

<sup>3</sup> Esalemaki ete nazuaki ye, na ntongo oyo. Pe azalaki mpenza kolobela lolenge nini lisumu ezalaki koyikana na mokili lelo, pe azalaki. . . Pe nakendeki moke mosika koleka esika ya radio wana, nakitaki pe nayokaki moto mosusu. Ntango nakómaki awa, etikalaki moke mpenza ete, namitunaki soki ntango esilaki mpenza koleka te mpo na koya na losambo, na ntongo oyo, ntango nakómaki. Na bongo, tozui mpenza—mpenza litomba mpo na kozala awa na mpokwa oyo, pe kozala na mosala kati na mosala ya Nkolo.

<sup>4</sup> Pe nazalaki kolobela Ndeko Neville, pe nsango epesamaki, mokolo mosusu, na elenge mwasi oyo, ndeko na biso ya mwasi oyo auti kotika biso. Ezalaki, biso nyonso toyebi nani ye azalaki, ezali Ndeko mwasi Weaver. Pe nazalaki kokanisa mpo na moto moko awa, oyo akozua libatishi na mpokwa oyo; ye wana. . . Nabatisaki ye na ebatiselo oyo ntango ngai. . . basengelaki komema ye awa na kiti ya bibósono. Azalaki kobunda na liwa, na bokono ya cancer, pe atikalaki bobele na butu wana; minganga balembaki ye, alingaki kokufa na ntongo elandi. Nakendeki na ndako na ye pe namekaki kosolola na ye na ntina na kobikisama ya bo-Nzambe, pe ye azalaki bobele kozongela maloba oyo: “Nakoki te ete óngela na nse na nsámba na ngai.” Alobaki: “Na—nakoki te mpo motei ázala kati na ndako na ngai.” Alobaki: “Nazali mosumuki.” Kasi alobaki: “Misie, nalingi kokufa boye te.” Na bongo, Grace Weber, ya awa, amemaki ngai kuna. Nautaki kokóma, ná kolemba ya mayangani; pe ntango nazalaki kobondela mpo na ye kuna, pe kotangela ye Makomi, abikisamaki. Na sima, akokaki ata kotombola loboko na ye te, kasi alingaki kopesa moto nyonso mbote ya loboko. Ye. . . eloko moko ekómelaki ye.

<sup>5</sup> Pe ntango oyo bazalaki kopesana mbote ya loboko, namonaki ye na emononeli azali kokende na lopanga ya basoso, pe kozonga.

Nalobaki: “Malamu, sikawa, nyonso ekoleka malamumu”; pe esili koleka mibu zomi na mwambe. Pe asilá kotiká bokono ya cancer yango na sima, kobanda wana. Soki ákufaki. . . Akufaki na cancer moke te, asalaki crise ya motema, yango nde ebomaki ye. Batiaki ye na bombone; akufi na crise ya motema.

<sup>6</sup> Na bongo, nazalaki kokanisa, na suka mpenza, ntango bato babandaki kobima, bakoka pe koyemba, *Na Sima, Yesu Ayaki*. Yango mpenza nde likambo esalemaki, Ayaki pe Abatelaki bomoi na ye mibu zomi na mwambe yango. Pe namilobelaki, “elongobani mpenza.” Ntango mosusu mwasi yango ayebaki te ete azalaki kosala yango, ndenge wana. Na sima, akokaki pe koyeba. Kasi yango elongobanaki mpenza mpo na kozala na eteni wana, *Na Sima, Yesu Ayaki*.

<sup>7</sup> Sikawa, ezali mwa moke liboso, na—nabanzi, ezali mpenza mayangani ya motuya mpo na ngai. Nakómi nkanda—nkanda. Na ntongo oyo, nazalaki na motema likolo mingi, pe nakendeki ko—kobondela. Na—nasili kozonga awa, esika na ngai. Libota, namemaki bango na Arizona, pe nazali. . . mpo bana bázonga na kelasi. Pe nazongi awa mpo—mpo nápema mwa moke, nákende bokila elongo ná Ndeko Wood pe bandeke mosusu bazali awa; tokokende bokila, na mpóso oyo ekoya. Tokokende na Kentucky. Pe nazalaki. . . nasilaki kozala. . . Esalemaki ete nakómaki mokolo oyo—oyo Mme Weaver akufaki, pe ezalaki malamumu ete nazalaki awa mpo na kosunga Ndeko Neville na matánga yango.

<sup>8</sup> Pe nazali komeka te. . . nazali komeka ko—koloba mingi koleka te mpo na yango, boyebi, liboso na bato oyo bazali komilela. Mpamba te, nakanisi, moko na makambo ya nsómo koleka ezali, komona mo—mobali to mwasi oyo amilelaka ntango nyonso. Nakanisaka ntango nyonso: “Nzambe, bátela ngai na likambo yango.” Bomoni, e—elembisaka kondima ntango nyonso, boyebi. Oko—oko. . . soki o—soki o. . . Nayebi ete ezali biso kokóma mibange, moko moko na biso, makambo ndenge na ndenge ekokómela biso. Pe nayebi ete makambo mike—mike wana ekokóba kobakisama, wana ozali kokóma mobange, ekosalema. Kasi nakanisi ete moko na makambo ya nsómo koleka, ezali ete Satana álatisa bomoi ya moto na motóle: mobange mobali to mwasi oyo amilelaka—lelaka, bomoni. Na—nabanzi ete ngai nakokóma esika wana te. Nabanzi ete nakoki komema yango, mikumba na ngai, pe—pe nakokóma esika oyo. . . Nalingi ete bomoi na ngai élata motóle ya Nkembo na Nzambe: Motema molai na Ye, boboto, kimia, komikitisa, pe étondisama na Molimo Mosantu.

<sup>9</sup> Pe ngai. . . moko na makambo na ngai minene oyo etungisaka ngai ntango nyonso na bomoi na ngai, ezali kozala motema likolo—likolo. Ezali été ntango nalembi mingi, ntango wana nde nabukanaka mpenza nzoto. Nakómaka. . . emonanaka lokola moto moko te azali kotala likambo na yo, boyebi, pe—pe okómi

mpenza . . . Ekómelaka pe bino. Pe esalemaka ete elekelaka ngai mpenza, boyebi, pe ntango mosusu ekómaka mpenza mpasi mingi, kino nakokaka mpenza te . . . Ezali tension, yango nde epésaka yango. Pe na ntango wana, nakómaka esika moko, oyo mbala mingi, koleka mpenza mpo na bimononeli mingi wana, bomoni, nde ekomelaka ngai. Natali moto, namilobeli: “Oyo ezali emononeli. Te, te, te, ezali yango te. Iyo! Ezali yango te?” Bomoni? Pe, bino boyebaka mpenza te eloko na motuya nini esengelaka na yango. Na sima—na sima o—okomituna mituna. Na sima okobanda kokanisa: “Ee, ozali . . .” Na sima omibendi pembeni pe omilobeli: “Ee, sikawa, na—nasali mpenza nini? Ngai oyo, nazali—nazali na mibu ntuku mitano kasi nasali eloko moko te mpo na Nkolo; pe na—nabandi kokóma mobange. Pe eloko nini . . . ? Oh! la la!” Na sima okómi na . . . oyo tozaláká kobenga “mawa-mawa.” Bamosusu na bino, bandeko pene na mibu na ngai, bozali komikanisela eloko nini bazaláká kobenga “kokóma mawa-mawa”. Papa azaláká kolobela yango, pe nazaláká komituna eloko nini alingaki koloba, kasi sikawa nayebi mpenza eloko nini alingaki koloba. Na bongo, obandi komiyoka bongo, ata bongo ezali na yango solo te; ezali bobele yo, oyebi yango. Bomoni, oyebi yango, yo moko nde ozali kosala yango.

<sup>10</sup> Na bongo, nazalaki koluka komikitisa motema mwa moke sikawa, pe komilengela mpo na—mpo na kotindikama monene oyo, nabanzi, ezali koya kala mingi te. Na sima na koleka na . . . Nasengeli kokende na New York noki-noki, pe ngai . . . mpo na mayangani ekosalema kuna, kopalanganisa—nsango-malamu. Na sima nakokende na Shreveport, na sima nakozonga na Phoenix. Na sima nakozonga nzela ya westi . . . na ndelo ya sudi ya Etats-Unis. Na sima, bazali sikawa kolengela makambo mpo na mobembo tokokende na mikili mosusu, mpo na kobanda noki-noki mpenza, sima na mokolo ya liboso ya mobu tokobanda, ntango mosusu na sanza ya misato to minei, ndenge wana; kobanda na Stockholm to Oslo, pe kokende na mokili mobimba, soki tokokoka, na mobembo oyo ekoya.

<sup>11</sup> Pe sikawa nazali esika na ngai, mpo na kopema mwa moke, kozonga mwa moke na ngai moko pe kozua makasi ya sika. Pe, soki Nkolo alingi, nakozonga mokolo na lomingo ekoya, kolongwa na Kentucky. Pe—pe soki nyonso ezali malamumu, soki esepelisi Nkolo, pe Ndeko Neville amoni mabe te; ee, nakomeka kozua liyangani ya lomingo ekoya, soki—soki Nkolo alingi. Pe, soki Alingi lokola Ndeko Neville, na—nakozala awa. Iyo misie, Azali na . . . soki Alingi yango lokola Ndeko Neville. Nazali kolikia ete Akolinga. Sikawa, bomoni, na boye nayebi ete etikali moke, soki Nkolo alingi, nakozala mosika na bino mpo na ntango moko.

<sup>12</sup> Pe na . . . na mateya mike-mike, soki nazui eloko moko moke na motema na ngai, pe na—na—nayoki mposa ya koyebisa bino

yango, bomoni, tokoki kosangana zinga-zinga na yango. Sikawa, nazali na yango mwa mingi, mitano to motoba oyo esili koyela ngai mikolo oyo eleki. Eleki mikolo mibale to misato, nakendeki bokila ya bisende pembeni awa. Nakendeki na zámba, pe namemáki ekomeli ná lokasa. Bomoni? Sikawa, pene na ntango ekomaka ntango malamau pe ntango ezali kotána, namiyokemeke na nzete, esika moko. Soki mpongi eyibi ngai te, nabandaka kobondela, na sima ngai, soki Nkolo apesi ngai eloko moko, nakobanda kokoma mwa makambo yango, bomoni. Boyebi likambo nalingi koloba; ntango ozongi na yo moko, na sima oko . . . Na sima, ntango nazongi, nakomi yango nyonso na etando ya lokásá. Na bongo, ntango bakobengisa ngai, nakokende na lombangu etando ya lokásá na ngai pe nakobanda kotala yango mpo náyeba likambo nini nakoki kobanda na yango, bomoni. Yango nde likambo esili kosalema sikawa.

<sup>13</sup> Bongo sikawa, soki Nkolo alingi, nalingi koloba bobele. . . Nakomeka koyeisa. . . kokáta mateya minene, milai wana, bomoni; esika ezua bino ba-ngonga ebele. Pe Nkolo asungaki ngai mpo náteya mokuse mpenza na Chicago, kuna na mpokwa ya suka; pene na miníti ntuku misato. Pe moto moko ayaki koyebisa ngai: “Nandimaki te ete okokoka, kasi osali yango!” Na bongo, miníti ntuku misato, esika ya kosala pene na ngonga mibale na ndambo, to misato, boyebi. Na bongo, ntango mosusu nakoki kosala mbangu na mpokwa oyo pe komeka-meka mwa moke, mpo náumisa bino mingi koleka te.

<sup>14</sup> Nzambe ápambola bino. Ata nakei esika nini, ezali ata moke te na esika moko lokola losambo oyo. Ezali ndako na ngai, ndako kitoko. Pe nazali kokabola mawa ná libota Weaver. Ná ndeko ya motuya ya moindo oyo akufi, nabondelaki elongo na ye mwa moke, liboso ákende, pe azalaki moto ya ezaleli malamau. Azali sikawa na Ndako elongo na Nzambe, pe esili nye. Bosengeli kokende, ata ndenge nini, biso nyonso toyebi yango. Na bongo tozali. . . tika ete Nkolo ápemisa milimo na bango na kimia, pe mokolo moko tozali na elikia ete tokokutana lisusu na Mboka moko kuna, esika bokono, mawa to liwa ezali te. Kino na ntango wana, tósala nyonso tokoki kosala mpo na Nsango-malamau.

<sup>15</sup> Mpo na likambo ya tension, nazalaki kobondela mpo na yango na ntango ya lelo. Okosala nini soki ozali na tension te? Kanisa naino. Tension ezali eteni ya bomoi. Epesaki ngai mwa makasi ntango nakanisaki likambo yango. Soki ozalaki na tension te, olingaki kozala lokola mwana popi ya elambá, olingaki kozala na mayóki te. Eloko moko te ekokaki kosalisela yo makambo. Lokola mwasi ná mobali, ntango mosusu, soki mwasi alingi kosala likambo moko, pe bazali komeka kosala yango elongo (koleka mingi Baklisto), pe moninga alingi. . . Na bongo, ntango bokutani mpo na. . .yo omoni likambo ye asali; ye amoni. . . Bomoni, tension nde ebéndaka bino kozala pembeni koleka. Moto moko akoloba na yo ete: “Ee,” alobi,

“kanisa naino mwasi wana, oyo alekaki na makambo mingi ya mpasi, ntango ozalaki mpenza malamumu te, to mobali wana oyo alekaki na makambo mingi ya mpasi, ntango yo ozalaki mpenza malamumu te. Na sima, ntango nyonso wana elimbisami, tálá ndenge omiyokaki mpo na ye. Oh! la la! yo...” Bomoni, bosengeli kozala na tension. Esili wana.

<sup>16</sup> Bókanisa naino, mpo na komiyoka, bongo soki ozalaki komiyoka te, mpasi te to eloko moko te? Bongo soki mpasi ata moke ezalaki te? Olingaki kozala na komiyoka ata moke te. Bomoni? Pe soki ozalaki komiyoka ata moke te, na bongo olingaki kozanga moko na biyokeli na yo. Bomoni? Na bongo, bomoni, makambo nyonso ezali na ntina, ata ndenge nini. Na bongo: “Nzambe, pesa biso bobele ngolu mpo na kotelema likolo na yango,” yango mpenza nde likambo. Soki totelemi bobele ngwi ná ngolu wana, pe totelemi wana pe tolobi: “Toyebi ete ntango bomoi oyo ekokóma na suka, oyo ya malamumu koleka ezali na ngámbo mosusu, esika tozali koluka kokende.” Na bongo, to—tomikanisela ete makambo nyonso oyo, ezali tension.

<sup>17</sup> Kasi, bato mosusu bamekaka kolobela Boklisto, ete “okozala lisusu na mitungisi te. Okózala . . .” Te, bongo te. “Okozala lisusu na tension te.” Oh, te! Okobakisa nde tension ntango okómi Moklisto, mpo liboso ozalaki lokola kotala makambo te, kolanda makambo te, ata likambo ezalaki ndenge nini, kuna, ozalaki kokéba te na makambo ozalaki kosala.

<sup>18</sup> Kasi ntango okómi Moklisto ya solo, ntango nyonso komituna: “Nazali kosepelisa Nkolo na ngai? Soki nakoki koyoka Ye kolobela ngai!” Epésaka yo tension, etindaka yo kosénzela. Yangu nde esalaka ete ózala oyo ezali. Na bongo, sima na nyonso, tension ezali lipamboli. Etali lolenge ozali kotalela yango. Etali lolenge ozali kotalela yango. Bomoni? Soki otali yango na ngámbo mosusu, ezali—ezali . . . Ata okáti eloko ndenge nini, ekozala kaka na ngámbo mibale, bomoni. Na bongo, osengeli komona ngámbo nyonso mibale.

<sup>19</sup> Boye, tension . . . Nakanisaka: “Oh! la la! ezali . . . Tension oyo ezali nini? Soki nakokaki kobotama kozanga tension oyo.” Ee, soki nazalaki na tension yango te, nalingaki kozala oyo nazali te. Nalingaki kozala Moklisto te, ntango mosusu. Tension yango nde ebendaki ngai epai na Yesu Klisto. Bomoni? Na bongo, ezali eloko ya lipamboli mpo na ngai.

<sup>20</sup> Boye, ezali ndenge Polo alobaki, ntango azalaki na tension to eloko ya ndenge wana, asengaki na Nkolo mbala misato mpo na—mpo na kolongola ye yango. Kasi Nkolo alobaki: “Saulo, ya Ngai . . . Polo, ngolu na Ngai ekoki.”

<sup>21</sup> Alobaki: “Na boye, nakomikumisa na bolembu na ngai. Na bongo, ntango nazali na bolembu, nazali na makasi.” Bomoni? Ntango nyonso oyo ezali mpo na mokano na Nzambe, ezali malamumu.

<sup>22</sup> Sikawa, nalukaki elongi na Ye, mokolo moko, ntango ezalaki kotungisa ngai mingi mpenza, ezalaki kobangisa ngai. Pe Ayebisaki ngai, eleki pene na mibu mwambe to zomi, Alobaki: “Ekobangisa yo lisusu ata moke te.” Pe ebangisaka ngai lisusu te. Te, misie; bó—bómitungisaka mpo na yango te. Nayokaka yango kasi, nayebi ete ezali wana; kasi nakendeke na ngai liboso mpo ebangisaka ngai lisusu te, nazongisaka matondi mingi mpo na yango.

Sikawa, Akokaki koloba: “Ekozala lisusu te,” bobele lokola: “Okobanga lisusu te.”

<sup>23</sup> Bongo, ezali mokano na Ye ete ésalema, boye nayambi yango pe nalobi: “Matondi Nkolo, nakotambola ndenge wana.”

<sup>24</sup> Sikawa, tógumba mitó mwa moke mpo na—mpo na kobondela. Bosénga ya moto-na-moto ezali? (Namoni miswále etiami awa.) Bótombola maboko. Nkolo, pambola bana na Yo moko na moko.

<sup>25</sup> Tata na biso na Likolo, tozali sikawa kobeleva na Ngwende na Yo monene ya nkembo pe ngolu, mpo eséngamaki na biso ete tóya. Tozali koya mpo tobengami na Yesu Klisto. Pe toyei ná mitungisi na biso nyonso, pe tobwáki yango likolo na Ye mpo Ye moto abátelaka biso. Ezali mpenza kobondisama monene, koyeba ete abátelaka biso. Nzambe monene ya Likolo, Mokeli; bátela biso, bikelamu na Ye. Totondi mpenza na esengo mpo na yango, Nkolo. Ezali mpenza kobondisama mpo na ba-ntango tozali kobika na yango, ntango oyo ezali komonana ete eloko moko te ekoki ko—kobondisa biso, soki Liloba na Yo te. Yango nde kobondisama na biso, ezali Elaká na Yo. Pe kati na Elaká na Yo, Olobaki ete tótalisa malombo na biso, pe: “Soki bosengi eloko moko na Nkombo na Ngai, Nakosala yango.” Pe Bilaka minene nyonso oyo: “Sénga pe okozua. Lobá na ngomba oyo: ‘Longwa wana,’ pe kotia ntembe te, pe ekolongwa.” Bilaká nyonso oyo, tokoki kozua Yango, nyonso tozali kosenga.

<sup>26</sup> Maboko etombwami, bazali na bosénga ya eloko moko, Nkolo. Oyebi bosénga na bango; kokisa yango, Tata. Natii libondeli na ngai elongo na ya bango liboso na Yo, loboko na ngai etombwami elongo na ya bango. Awa, likolo na eteyelo oyo, miswále etiami awa. Oh, bato oyo, bazali na kondima, kondima ya mpiko, Nkolo, . . . Emonani ete ezali eloko oyo Opamboli ngai na nzela na yango, kokoka kobondela mpo na babeli. Ata esika nini, na bisika nyonso, esika nyonso nakendeke, ezalaka likambo oyo etali kobondela mpo na babeli. E Nzambe, sunga sikawa. Nazali kobondela na bosémbó ete Ókokisa malombo ya miswále oyo esili kotiyama awa, mpo na bato oyo basengaki. Tika ete mawa na Yo ézala likolo na bango.

<sup>27</sup> Nkolo, toyoki ete Ndeko mwasi Hicks amemi mwasi moko awa, oyo ayei na mpépo mosika, esika moko, mpo bábondela mpo na ye, azali na bokono ya cancer; alingaki koyeba soki akokaki

koya na ye awa. Nabondeli, e Nzambe, ete óbatela bomoi ya moto yango; sálá yango. Mwana moke ya ndeko na ngai, Mikie, alali kuna, azali na bokono pe azali kosánza, azali na móto makasi; nauti kuna. Nkolo, na—nandimi ete tobondelaki libondeli ya kondima kuna oyo Osili kosilisa yango, pe na—na—nazongisi matondi na Yo, na koyoka ndenge móto ezalaki kotika mwana-mobali yango liboso na ngai kobima na chambre yango.

<sup>28</sup> Sikawa, Nkolo. . . pe natondi Yo mpo na makambo nyonso oyo. Sikawa epesameli ngai mokumba ya kolobela Liloba na Yo. Pésa biso Liloba na Yo, Nkolo. “Liloba na Yo ezali Solo.” Pámbole milimo na biso pe pésa biso ngo—ngolu oyo tosendeli na yango, ete tókoka kozua yango longwa na Bilaka ya Nzambe na mpokwa oyo, kati na Liloba, mpo na kosunga biso mpóso mobimba oyo; sálá yango. Pámbole mokengeli na biso, molimo ya mpiko oyo, mwasi na ye, bana na ye, basungi, bayangeli misolo, pe moto nyonso oyo akokota to akobima na ndako oyo; sálá yango, Tata. Na Nkombo na Yesu Klisto nde tosendi mapamboli oyo. Amen.

<sup>29</sup> Sikawa, nalingi kotángá na bisika mibale na makomi ya Nkolo. Nalingi kotángá liboso na Buku ya Nzembo, Nzembo 86. Na sima nalingi kotángá na Santu Matai, mokapo ya 16, 1 kino 3. Nalingi kotángá eteni ya Nzembo oyo, mobimba na yango te kasi kokita kino na molongo ya 11, ezali koleka kati-kati na yango.

<sup>30</sup> Pe nalingi koyebisa boye, soki napesi motó ya liteya, liboso náteya likolo na yango: *Ntango Ya Kosangana Pe Elembo Na Yango*. “Elembo ya ntango ya kosangana,” eyokani lokola likambo ya mindondo. *Kosangana* (Bomoni?) *Ntango*; ntango ya kosangana, yango nde likambo ezali sikawa. Pe *Elembo* ya ntango ya kosangana yango.

<sup>31</sup> Na—na Nzembo, libondeli ya Dawidi, Nzembo 86.

*E Yawe, sembola litoi na yo pe yanóla ngai: mpo nazali mobóla pe moto ya mpasi.*

*Batela molimo na ngai; mpo nazali mosantu: E Nzambe na ngai, bikisa mosali na yo oyo azali kotielá yo motema.*

*E Yawe, yokela ngai mawa: mpo nazali kobelela yo mokolo mobimba.*

*Sepelisa molimo ya mosali na yo: mpo epai na yo, E Yawe, nazali kotombola molimo na ngai.*

*Mpo yo, Yawe, ozali malamú, pe obelemi mpo na kolimbisa; pe otondi na mawa mpo na baoyo nyonso bazali kobelela yo.*

*E Yawe, pesa litoi na libondeli na ngai; . . . tia likebi na mongóngo ya malómbo na ngai.*

*Na mokolo ya mpasi na ngai nakobelela yo: mpo okoyanola ngai.*

Oh, ezali kitoko, boye te? “Okoyanola ngai.”

*E Yawe, kati na ba-nzambe, moko te azali lokola yo; pe mosala moko te ekokani na mosala na yo.*

*Bikólo nyonso oyo osili kosala ekoya pe ekokumbama liboso na yo, E Yawe; yo okokumisa nkombo na yo.*

*Mpo yo ozali monene, pe osalaka makambo ya kokamwa: yo moko ozali Nzambe.*

Bóyoka sikawa.

*E Yawe, lakisa ngai nzela na yo; na—nakotambola na solo na yo: sanganisa motema na ngai mpo na kobánga nkombo na yo. (Bomoko! Bomoni?)... sanganisa motema na ngai mpo na kobánga nkombo na yo.*

<sup>32</sup> Nazali sikawa kolobela kosangana; pe elembo ya ntango. Sikawa, na mokapo ya 16 ya Santu Matai.

*Bafalisai ná Basadukai bayaki, . . . komeka ye, batunaki ye ete álakisa bango elembo euti na likolo.*

*Ye azongiselaki bango ete, Ntango mpokwa ekómaka, bino bolobaka, Ngai. . . Mokolo ekozala malamú: mpo likolo ezali motane.*

*Pe na ntongo, Lelo ekozala mokolo ya molili. . . ya mbula: mpo likolo ezali motane pe eyindi. E bino bakosi, boyebi kososola bilongi ya likolo; kasi bokoki kososola bilembo ya ntango te?*

Nkolo ábakisa mapamboli na Ye ya ngolu na kotánga ya Liloba oyo.

<sup>33</sup> Sikawa, tozali kolobela kosangana oyo, ntango ya kosangana; elembo ya ntango ya kosangana. Bomoni, Yesu azalaki awa, na Likomi ya suka oyo totáangi, Azalaki kopámela ba-nganganzambe mpo bazángaki makoki ya kososola ntango to elembo ya ntango. Sikawa, ezalaka ntango nyonso likambo moko ya motuya mpo na bato, bomoni, kozala na makoki ya kososola *elembo ya ntango oyo bozali kobika na yango*; mpo Nzambe akomi yango polele mpenza, mpo moto moko te ázua nzela ya kokima yango.

<sup>34</sup> Sikawa, na momesano, nazongaka sima mpo na kozua ndakisa ya batei mosusu, basáli mosusu ya Nkolo na eleko ya Biblia (lokola elembo na ntango ya Nowa, elembo na ntango ya Daniele pe—pe bongo na bongo, bilembo ndenge na ndenge), kasi, na mpokwa oyo, nakotika yango pembeni mpo na—mpo na kowéla ntango, mpo nákoka. . . Kasi ezalaka ntango nyonso lolenge ya kosala ya Nzambe, mpo na kopesa bato e—elembo ya mokili mpo na ntango, mpo moto nyonso ákoka koyeba ntango nini e—ezalaki. Pe Bafalisai oyo basengelaki koyeba ntango na bango. Basengelaki koyeba ntango nini ezalaki. Alobaki esika



mosusu: “Soki boyebaki Ngai, bolingaki koyeba mokolo na Ngai.” Bomoni? E—ezali mpenza li—likambo moko ya motuya mingi mpo tósosola. Bomoni: “Kozánga lisósoli!”

<sup>35</sup> Yango nde likambo bazalaki ntango nyonso koloba mpo na basakoli, bazalaki koloba: “Pe azalaki na lisósoli, na nzela na bimononeli longwa na Nkolo. Pe Liloba na Nkolo ezalaki koya na ba—basakoli ya kala.” Bomoni, bazalaki na lisósoli ya Liloba na Nkolo, na nzela ya basakoli. Na bongo, basakoli bazalaki kopesa elembo. Ndakisa, moto moko aláláki mopanzi moko ntango molai mpenza, na sima abalukaki pe aláláki na mopanzi mosusu. Moto moko asengélaki kolongola bilambá na ye. Pe, oh, ezali na makambo mingi basalaki mpo na kotalisa elembo oyo bazalaki kobika na yango. Pe sikawa, toyebi ete Nzambe oyo asalaki likolo ná nse, pe—pe aléngelaki malamú mpenza mosala na Ye mpo Ákoka kotalisa ntango na Ye na nzela na bilembo, Nzambe yango moko azali na bomoi lelo. Boye, tosengeli kozala, eloko moko . . . Wana tozali komona nta—ntango nini tozali kobika na yango, esengeli kozala na eloko moko, oyo moto azali kozanga komona, esika moko. Bomoni? Mpamba te Nzambe akotika ata moke te ete makambo oyo ésalema, zánga kopesa biso elembo moko polele, mpo, mpo tó—tósosola.

<sup>36</sup> Sikawa, likambo ya lelo, yango oyo, ete bonganganzambe, tozali kotánga yango malamú te. Ezali lokola ezalaki na eleko wana, bakanisaki te ete ntango yango ekokaki. Ba—bakanisaki ete bazalaki kobika na kimia mpenza, na eleko wana, na bongo bazalaki na bango kozela Masiya te. Pe Yesu asilaki koloba ete Boyei na Ye ekozala “lokola moyibi na butu,” ntango oyo—ntango oyo bato bakokanisa ata moke te Boyei na Ye. Kasi ezalaki na bangondo mosusu oyo bakendeki kokutana na Ye, ndámbo na bango, bazalaki na mafuta na miinda na bango pe basilaki komilengela; bazalaki kotálela elembo yango. Pe ezali na baoyo wana nde nazali kolobela na mpokwa oyo, bomoni, na baoyo bazali kozela elembo sikawa, elembo ya Boyei na Ye.

<sup>37</sup> Bilembo oyo epesamaki na Nkolo, epesami bobele na bandimi. Bazangi kondima bamonaka yango ata moke te. Elekaka mpenza likolo ya mitó na bango, pe bamonaka yango te. Pe sikawa, lokola na bosóló mpenza, Mwanje ya Nzambe akoki kotelema na eteyelo oyo na mpokwa oyo, lokola na bosóló mpenza—mpenza nazali kotala bino, pe nakoki kotala yango; to bokoki kotala yango, pe ngai nakoki komona yango te, to ngai nakoki kotala yango pe bino bokoki komona yango te. Sikawa, boyebi ete elongobani na Makomi; ezali mpenza Solo. Bamonaki . . . Boyebi ete Polo akweyaki na nsé, kasi bango . . . moto moko te kati na bango akokaki komona Pole yango.

<sup>38</sup> Pole yango ezalaki mpenza wana ntango Yoane atelemaki wana liboso na bato mingi, pe nkóto na nkóto na bato bazalaki kuna na libóngo, banganganzambe ná—ná bato ya bwanya, bato minene. Pe Yoane alobaki, ye moko, atatulaki ete amonaki

Molimo ya Nzambe kokita lokola ebenga pe kokita likolo na Ye, pe Mongongo moko elobaki: “Oyo nde Mwana na Ngai molingami oyo Nasepeli kofanda kati na Ye.” Kasi moto moko te amonaki Yango, bobele Yoane. Bomoni? Ezalaki bobele mpo na ye.

<sup>39</sup> Bomonaki ndenge ezalaki polele, elembo mpo na bato ya mayele? Batalaki, ezalaki . . . Bazalaki Baebele. Bazalaki mpenza banganga-minzoto ba-Indi te, bazalaki Baebele; mpo bakendeki kuna, na ekólo wana, mpo na koyekola makambo ya minzoto, mpo na kosilisa kelasi na bango. Pe ntango bazalaki . . . batalaki ngámbo ya Yelusaleme, koyeba ete bamonaki minzoto misato yango, kokokana moko na moko na—na molongo-ya-mbotama na bango, ya Káme, Séme ná Yaféte, bango bazalaki bakitani ya mabota yango, moko na moko, pe bamonaki minzoto yango, na molongo-ya-mbotama na bango. Ezalaki elembo mpo na bango, ete ntango minzoto yango etandámaki na molongo, Masiya azalaki na mokili.

<sup>40</sup> Oh! la la! Kokamwa te ndenge bayaki: “Azali wapi? Azali wapi Mokonzi ya Bayuda oyo abotami? Tosili komona Monzoto na Ye na Esti, pe toyei mpo na kokumbamela Ye. Azali wapi?” Bayebaki ete mwana yango Masiya azalaki esika moko boye, mpo Nzambe apesaki bango elembo ya ntango, ete Nzambe ná moto bakosangana. Oyo nde bomoko, ntango Nzambe Ye moko asangani na nzoto ya moto! Likambo ya motuya, likambo ya monene koleka kosangana nyonso oyo esilá kosalema, ezalaki ntango Nzambe asanganaki ná moto; atikaki lo—lolenge na Ye ya nkembo ya kozala Nzambe, pe atelemisaki hema na Ye pe akomaki moto kati na bato, pe akómaki moko na bango mpo na kosikola bango. Bomoko. Esalaki nini? Ememáki kimia kati na Nzambe ná moto mpo na libela. Tozongisi matondi mingi mpo na yango.

<sup>41</sup> Pe bilembo etindamaki te . . . Sikawa, bókanisa naino, moto nyonso, pe banganga-minzoto nyonso; bato ya eleko wana, sáá na bango ezalaki minzoto. Sinzili azalaki komata likolo ya—ya linóngi, ezalaki ye kokóma kuna, azalaki kosénzela. Pe amonaki ntango minzoto mosusu ezalaki kosangana, ntango ezalaki koleka, azalaki koyeba ntango nini ekómaki. Bomikanisela na Makomi: “Sinzili, tokómi ntango nini?” Pe sinzili azalaki koya koyebisa ye ngonga nini ekómaki. Bomoni, bazalaki koyeba ntango na minzoto.

<sup>42</sup> Sikawa, ezali likambo ya kokamwa te ete minzoto yango etandamaki mpenza na molongo mpo na bato misato, kasi moto mosusu te amonaki yango? Bomoni? Ezalaki mpenza na molongo. Sikawa, okoki mpenza kozala na molongo ná Makomi. Bomoni? Ntango minzoto yango ekómaki na bomoko, ntango esanganaki elongo na lisanga yango, bato misato pe basanganaki na ntango yango moko. Pe okoki mpenza kosangana ná Nzambe, kati na Liloba na Ye, kino makambo oyo ekóma makambo-ya-solo, pe

okoki komona yango pe koyeba ete ezali solo. Bomoni? Elembo ya ntango! Miso na yo ekoki mpenza koleka likolo na yango, pe olobi: “Ah, boléma!”

<sup>43</sup> Kasi mpo na *yo* ezali boléma te. Mpo na yo, osili kosangana ná Liloba, pe Yango oyo. Na ntango wana, ekómi—ekómi mpenza Pole, Ndeko Pat, ntango—ntango—ntango—ntango omoni elembo yango kosangana ná mondimi. Pe na ye nde nazali koyebisa likambo oyo, ezali na mondimi, mpo mozangi kondima akomona yango ata moke te. Pe ekozala mpenza mpáméla soki Azalaki na mokili lelo; mpo na ba-nganganzambe mingi na biso lelo, baoyo bakoki kosósola elembo oyo te; bilembo oyo tozali kosósola mokolo na mokolo awa na mongombo, pe makambo tozali komona. Bato mosusu bazali kotánga yango pe komona likomi na etutu, ata bongo, bato mingi bayebi yango te, pe bazali ata komona yango te, ata moke te. Mpo na bango, ezali na ntina ata moko te; bazali komona yango te.

<sup>44</sup> Sikawa bótala malamú, kati na likambo oyo, A—Atalisaki bango bilembo ya bikólo. Sikawa, ntango batunaki Ye motuna oyo, bazalaki na mposa ya bilembo; pe Apesaki bango bilembo oyo ekokisamaki. Bazalaki na mposa ya koyeba ntango nini suka ya mokili ekozala, eloko nini ekozala elembo ya suka. Pe Atalisaki bango bisika mingi kati na Makomi, mpo na bilembo ya bikólo, mpo na bilembo ya likolo, na likolo, pe bilembo ya mokili; Apesaki bango bilembo, elembo, bilembo, ntango nyonso elembo. Pe ntango . . . Alobelaki bango kuna, esika moko, mpo na elembo ya ekólo, Alobaki: “Ntango bokomona bikólo,” bomoni, “ebandi kosangana zinga-zinga na Yelusaleme,” bomoni, na ntango wana tokoyeba ete ntango ya minyoko na bango ekómi pene, “ntango bokomona Yelusaleme kozingama na mampinga.”

<sup>45</sup> Sikawa, liboso bákoka kosala yango, Nzambe . . . Mokili esengelaki kosangana. Titus, général monene oyo ya Roma asengelaki kosangisa mampinga na ye pe koya zinga-zinga, sima na Bayuda kobwakisa elembo ya ntango, oyo Nzambe apesaki bango. Ezali na ntango wana nde Titus asangisaki mampinga na ye, pe ayaki kozua engumba yango. Esengelaki liboso ete libota ya Nzambe (ya maloba) ésangana mpo na kotelemela Liloba na Nzambe, liboso ekólo wana ékoka kosangana mpo na kotelemela libota ya Nzambe. Bomoni, bo—bo—bomoko, kosangana; kosangana elongo.

<sup>46</sup> Nandimi ete tozali kobika na ntango monene ya kosangana. Nazali kozua miinda motane oyo, pe bilembo ya kopela-pela pe nyonso wana (basi, lolenge bazali kosala; ná mibali, lolenge bazali kosala; pe mangomba, lolenge ezali kosala), nazali kotalisa na etóngá moke oyo, na motema na ngai mobimba, ete nandimi ete tozali mpenza kokokana na molongo ya Liloba na Nzambe mpo na ngonga oyo ya motuya ya lisakoli, liboso mpenza na boyei ya Nkolo Yesu; tozali kosangana elongo pe komilengela.

47 Sikawa, bomoni, liboso Titus ásangisa bikólo ya . . . ásangisa mampinga na ye elongo, Yisalaele basanganaki elongo pe bamisangisaki elongo, été bakondima te Yesu azali Masiya. Baboyaki Ye, babwakisaki Ye, pe babakaki Ye na ekulusu. Na ntango wana, ntango baboyaki lobiko oyo etindamelaki bango, basanganaki elongo mpo na kosala yango. Sikawa, bóbosana yango te: basanganaki elongo mpo na koboya Nsango ya eleko! Basengelaki kosala yango. Na sima, ntango basalaki yango, na sima elembo ya ekólo eyaki.

48 Bikólo ekómaki kosangana, pe Titus ayaki ná mampinga minene wana ya ba-Roma ná ya ba-Greki, pe bazingaki bitutu ya Yelusaleme, bakangaki bato yango kuna na kati, pe babomaki bango na nzala. Baliaki ba-mposo ya nzete. Josephe, mokomi monene ya mambi-ma-kala ayebisi biso yango. Pe baliaki matiti ya mabelé. Baliánaki ata bana sima na kotokisa bango; bomoni, mitó na bango ezalaki kosala lisusu malamumu te. Na tango wana, sukasuka, Titus azalaki kofanda likolo na bangomba, kuna, zinga-zinga na Yelusaleme, pe—pe bato yango oyo bazalaki kuna na kati, bazalaki kokanisa ete bazalaki kosala mokano ya Nzambe, ntango bamonaki mampinga yango koya. Babóyáká koyoka Motei Monene yango, makambo Nkolo Yesu ayebisaki bango.

49 Ata Moklisto moko te akangamaki kuna na kati, mpo bamonaki elembo pe babimaki. Bomoni? Balobaki: “Tika ete baoyo bakozala likolo ya ndako bákita te, to ye oyo akozala na elanga ázonga te mpo na kozua kazáka na ye; kasi bókima na Yuda, pe bóbondela mpo kokima na bino ésalema te na eleko ya malili, to mokolo ya Sabata.” Mpamba te, na eleko ya malili, ba—ba-ngómbe ekotonda na neige; pe mokolo ya Sabata, ekuke—bikuke ekokangama, ekuke monene, pe bakokangama lolenge wana. Bomoni? Tolingi kokoma na yango kala mingi te, na ntina na . . . ndenge Nzambe asalaka makambo yango, soki Nkolo alingi.

50 Sikawa bótala malamumu, Ye . . . Babondelaki mpo ésalema . . . mpo ésalema lolenge wana te, Yesu ayebisáki bango ete bábondela mpo na yango, pe bakangaki ata moko na bango te kuna na kati. Basilaki kobima, mpo batalaki elembo, pe basilaki kobima; likambo esilaki nyonso wana.

51 Oh, mangomba ya lelo esengelaki komona elembo ya ntango tozali kobika na yango! Bókima na lombangu nyonso na Kalvari, mpo na Bomoi; na lingomba moko te, kasi na Yesu Klisto. Bósangana ná Ye, kasi ná ebongiseli moko te to endimeli ya lingomba moko te. Bósangana ná Klisto, pe bóyéba na bosóló ete ezali Ye. Bokoki kozua eloko nyonso te, bosengeli mpenza koyeba ete ezali Ye. Ezali mpenza ntango ya lisanga!

52 Sikawa, tomoni ete baboyaki Masiya, na sima basanganaki elongo pe bamisalelaki likita, pe bazuaki mo—mo . . . mokano

moko kati na bango, ete moto nyonso oyo akoyamba Yesu lokola Mosakoli, bakobengana ye na lingomba. Bomikanisela elenge mobali mokufi-miso oyo bamemaki ná miso ya kokufa, boye te? Pe bayekoli balobaki: “Nani asalaki lisumu? Ye to tata na ye, mama na ye?”

<sup>53</sup> Pe Yesu alobaki: “Mpo na likambo oyo, ezali moko na bango te; ezali kasi mpo misala ya Nzambe ésalema, éyebana.”

<sup>54</sup> Pe bómikanisela, balobaki ete tata ná mama na ye bakokaki koloba eloko te. Balobaki: “Bayebi ete azali mwana na biso, kasi biso toyebi te ndenge nini abiki.” Mpamba te Bayuda balobaki ete moto nyonso oyo akotatola ete Azali Mosakoli, bakobengana ye na lingomba.

<sup>55</sup> Kasi, bomoni, misala ya Nzambe ezalaki ete, elenge mobali oyo azalaki moto ya etónge wana te. Pe alobaki: “Ee, ezali kokamwisa ngai ete boyebi te esika nini Moto yango auti, na ntango oyo Afungoli ngai miso.” Bomoni? Sikawa, ye akokaki koloba yango. Bomoni, ezalaki misala ya Nzambe. Asilaki kobikisama, pe kokóma malamú, pe akokaki—akokaki koloba yango mpo eloko moko te ekangisaki ye esika moko. Misala yango esalemaki likolo na ye, pe na ntembe te amonaki ye. . . mbala na ye ya liboso na bomoi na ye.

<sup>56</sup> Sikawa, Bayuda basanganaki elongo mpo na kotelemela Yesu pe—pe kotelemela mosala na Ye ya Masiya pe Nsango na Ye ya Masiya. Tomoni likambo yango moko kosalema sikawa, likambo yango moko mpenza. Communisme ezali kosangana mpo na koboma lingomba, pe lolenge bobele moko oyo yango. . . ekosalema sima na lingomba kosangana yango moko pe, na Lisangana ya Mangomba, Lisangana ya Mangomba ya Mokili mobimba, mpo na koángana pe koboma Nsango, Liloba! Basili koboya Liloba, mangomba! Bakoki koyamba Yango te mpo Ezali kotelemela bindimeli na bango ya bibongiseli; ata Makonzi na Móto boni ekomonisama kati na biso. . .elongo na bato, to bato boni bako. . .ata makambo boni ekolobama liboso pe ekokokisama, ná bilembo minene nyonso oyo Alakaki mpo na eleko ya suka; bakoki kondima yango te.

<sup>57</sup> Boye, bazali kosangana sikawa, pe mokengeli na bino awa pe bato mingi bakoki koyebisa bino yango, baoyo bazali kotánga, ete bazali. . . bazali na lisanga ya mangomba ya mo—mo—mokili. Pe. . . motei moko ya ba-Lutherien azali mokonzi na yango. Ezali ete, soki likámá monene esalemi, ekómeli bazalani oyo awa; soki tosangani na lisangá ya mangomba wana te, na boye losambo na biso ekoki lisusu kozala losambo te, pe bakoki kokomisa yango esika ya ebómbelo. To soki moko na biso bandeko amoni moto moko kobunda na liwa to azoki mpóta, pe ameki kosunga ye na lipamboli ya Molimo, bakoki kobeta biso masasi mpo na yango; ya solo mpenza. Bakoki kokátela biso mibu zomi na bolóko monene ya letá mpo tosungáki moto, mpo tokoti na lisangá

ya mangomba wana te. Bozali komona te elembo ya nyama? Bomoni? Bomoni?

<sup>58</sup> Sikawa, tomoni été ntango ya kosangana yango ezali koya. Bomoni? Sikawa, bótala! Na sima, lingomba esili kosangana mpo na kotelemela Nsango; na bongo, ntango esali yango, mabota ezali kosangana kati na Communisme mpo na koboma lisusu lingomba; ezali mpenza likambo basalaki na ebandeli. Bomoni? Likambo yango moko ekómi kosalema lisusu.

<sup>59</sup> Esengelaki liboso na Yisalaele koboya Nsango. Pe ntango baboyaki Nsango, na sima mampinga, bomoi ya ekólo esanganaki elongo (ya bikólo mosusu), pe bayaki koboma lingomba. Pe lelo, basili koboya Nsango ya Nkolo Yesu, pe basili kobwakisa Yango. Pe sikawa ntango esili kokoka, oyo Communisme ezali kosangisa mokili mpo na kotelemela lingomba. Bomoni, esengeli kosalema bongo. Sikawa, ezali mpasi mpenza mpo na koloba yango.

<sup>60</sup> Ezalaki mpasi mpenza mpo Bayuda wana bándima. Balobaki: “Sikawa bóya, bandeko, tomoni ete—ete Nzambe na biso—na biso azali na biso, na bongo toko—tokokota na tempelo. Pe sikawa, tokobondela, pe kotika tata mosantu *Songolo-Pakala* ná tata mosantu *Songolo-Pakala* kokamba libondeli. Bókanga ekuke monene!” Pe Titus atelemaki ngwi, azalaki wana pene na mobu mobimba to koleka. Bomoni, azalaki wana kosenzela, pe abomaki bango na nzala mpenza. Ata moko na bango te akokaki kobima libanda na engumba; pe bakufaki na nzala. Pe ntango akotaki kuna pe abukaki bitutu yango, makila esopanaki pe etiolaki kuna lokola bibale, esika abomaki nyonso wana ezalaki kuna na kati.

<sup>61</sup> Sikawa, Mwanje na Nkolo asakóláká yango, kalakala na Kondimana ya Kala, pe alobáká ete likambo yango ekosalema. Kasi batei oyo bazalaki ba-nganganzambe, oyo basengelaki kozala na bisika yango pe koyebisa bato likambo yango; esika yango, ntango Yesu azalaki elongo na bango, bayebaki ata Ye te; pe balukaki kokómisa yango e—e...eloko oyo—oyo Ya solóka: “Sálela biso bikámwa, tómona lolenge—lolenge nini esálemaka! Lakisa biso elembo.” Bomoni?

Pe Alobaki: “Ngai. . .” Ee, Asilaki kosala makambo mingi mpenza, kasi ata bongo bakokaki komona yango te. Bomoni? Na sima, ntango baboyaki Ye lokola ya bango. . .Nsango ya eleko wana, baboyaki Nsango ya eleko wana.

<sup>62</sup> Bazángaki komona elembo ya eleko wana. Pe elembo ya li—lisakoli ya Biblia etalisamaki liboso na bango, pe balobaki: “Tókota sikawa!” Bato yango bazalaki basantu. Bazalaki bato oyo okokaki kolakisa mosapi na bomoi na bango te. Bakokaki kozala *bongo* te, pe—pe mpo na kozala nga—nga—nganganzambe. Nganganzambe azalaki kobomama, kobomama na mabángá mpo na likambo ya moke mpenza. Na bongo

asengelaki kobika bomoi ya peto, ya bulee. Akokaki kosala bongo te, mpo akobomama na mabángá mpo na likambo nyonso. Na boye, bazalaki bato minene, pe basántu na miso ya bato, kasi bakotaki kuna pe balobaki: “Sikawa toko . . . Tozali na Nzambe, Nzambe oyo azalaki na biso na bileko nyonso oyo. Tokokota na tempelo na Ye ya bulee.” Oyo wana ezalaki tempelo ya bulee ya Nzambe! Kasi, bomoni, Aboyamaki kati na tempelo na Ye ya bule. Bomoni? “Tokokota na ndako ya Nkolo. Sikawa, bino nyonso, Baebele, boyebi ete tozali libota liponámi, biso baoyo tozali awa. Pe Nzambe azali Nzambe na biso; Nzambe ya Abalahama, Yisaka pe Yakobo. Azali na biso elongo. Akokangola biso na maboko ya bisúté ya Bafilistia yango (ndenge esalemaki), ba-Roma ná ba-Greki oyo. Akokangola biso na maboko na bango. Tókota na ndako ya Nkolo!”

<sup>63</sup> Yango ezalaki likanisi moko malamú; kasi basalaki nini? Motongí ya ndako azalaki kuna na kati, na lolenge ya mwa mosali-ya-mabaya ya Galilai, pe baboyaki Ye; ntango oyo Nzambe asilaki kotatola ete Azalaki Motindami na Ye ya eleko wana, pe Momboto. Pe babwakisaki Yango. Bongo, mabondeli nyonso, bosembo nyonso, mbeka na bango nyonso ezalaki na ntina moko te mpo na Nzambe. Basalaki yango! Kasi Nzambe atikaki mampinga monene wana kosangana mpo na koboma yango.

<sup>64</sup> Pe tozali komona lelo, ndenge mangomba, na nzela ya bibongiseli pe nyonso wana, bazali koboya Liloba na Nzambe. Balingi te ete bólobela bango makambo oyo, pe zebi ekoki kotalisa yango polele na nzela ya ba-fotó pe makambo nyonso mosusu, kasi ata bongo, balingi Yango ata moke te. Boye comunisme ezali kolengelama mpo na koboma yango, bobele ndenge Titus asalaki, pe Biblia elobaki ete bakosala yango. Yango mpenza!

<sup>65</sup> Sikawa, bomoni esika nini tozali kobika? Ntango ya kosangana. Ntango tozali komona makambo oyo kosangana, oh; mpo na nini tozali kozanga komona makambo yango? Bokoki—bokoki kotala awa, na Makomi, pe komona esika Alakaki yango, makambo nini Akosala. Sikawa, tozali komona yango kokokisama. Tozali komona, kati na lingomba, makambo Alakaki kosala; tozali komona yango kokokisama. Tozali komona bikólo kosangana. Tozali komona ba-isme kosangana. Tozali komona mangomba kosangana. Ezali ntango ya kosangana. Ezali ngonga ya kosangana. Ezali molimo ya eleko oyo: “Tosengeli kosangana.” Makambo nyonso bozali kolobela esengeli kobongisama malamú; ata yango te.

<sup>66</sup> Boyebi, lokola mwana-mboka . . . Nakoki te, lokola mwana-mboka, lokola mwana-mboka ya Etats-Unis, ata bongo na—na . . . soki opesi ngai cheque ya ba-dollar mitano, nakomeka kokoma nkombo na ngai likolo na yango te. Hum. Bomoni, nakoki kosala yango te. Bomoni, ezali ntango ya kosangana.

Nyonso esengeli koleka na nzela ya lisangá moko boye, pe lisangá yango ezali mpenza eloko oyo ekomema elembo na nyama. Bomoni? Ezali ntango ya kosangana, pe nyonso ezali kosala kino ekokota na likambo yango. Bokoki komona yango polele na miso na bino moko, soki botali yango. Ezali ntango ya kosangana, esika oyo makambo nyonso ezali kosangana.

<sup>67</sup> Moyuda—Bayuda basanganaki mpo na kotelemela Yesu, lokola Masiya na bango—na bango. Yango wana, tomoni makambo nini esalemaki. Tozali komona likambo yango moko sikawa, communisme ezali kosangana mpo na koboma lingomba, sima na lingomba kosangana na Likita ya Mangomba ya Mokili, mpo na komeka koboma Nsango, Liloba na Nzambe. Bazali komeka kobwakisa Yango. Eloko kobebe moko bakoki kosala ezali komisalela likita, mpo bazali na bokabwani; mwa etónge moko awa, ba-Methodiste, ba-Batiste, pe ba-Luterien, pe ba-Presbiterien, lingomba ya Klisto pe bongo na bongo ndenge wana. Bakoki kosala eloko moko te, mpamba te, *oyo* ekotelemela *oyo* wana, *oyo* wana ekotelemela *oyo kuna*, malakisi na bango ekeseni mingi mpenza lokola esti ezali mosika na westi. Bomoni, bakoki kosala yango te. Kasi soki basangani, na nse na motó moko monene, bakoza yango. Na ntango wana bakoza yango.

<sup>68</sup> Lolenge wana nde Bakatoliko bázalaka bongo na bomoko, Bakatoliko ya Roma, na ntembe te, bango bazali na bomoko, bazali. . .baoyo-baleki-mingi ezali Ba-katoliko ya Roma; ba-Greki ná Bakatoliko mosusu bazali—bazali mpenza mingi lokola Bakatoliko ya Roma te. Sikawa bazali kosangana, pe yango wana nde ntina bazali na bomoko. Ata likambo nini esalemi, pápa wana nde azali motó ya makambo nyonso. Bomoni? Pe ata moto mosusu alobi likambo nini: “Ye akweyaka te; azali—azali—azali mokitani ya Nzambe, esili wana; azali molandi ya Nzambe; azali na bokonzi likolo na lifelo, Lóla ná epóngelo.” Bomoni? Na bongo, na lolenge *wana*, likambo moko te ekoki kosalema; nyonso akoloba, yango nde ekosalema.

<sup>69</sup> Sikawa, ba-Protestant bazali komisalela motó moko ya ndenge wana, motindo moko. Pe Biblia elobi te ete basalaki elilingi ya nyama? Elilingi ezali nini? Ezali eloko moko lokola yango, esalemi lokola yango. Yango wana, eloko yango moko. Ezali nini? Na nzela ya kosangana elongo, pe yango nde molimo ya eleko oyo, ezali *kosangana*.

<sup>70</sup> Kosangana elongo, sikawa, bazali koluka koboma Nsango. Bazali koboma Yango ndenge nini? Ndenge nini bakoki koboma Liloba na Nzambe? Bakoki kokomisa Yango eloko ezángi nguya, ezángá nguya, na nzela na kondima mimesano ya bonkóko, ndenge basalaki kuna na ebandeli, bazali kokomisa Liloba na Nzambe eloko moko ezángi nguya. Bomoni, balobaka: “Oh, ezali. . . Na bosóló, sima na nyonso. . .” Bomoni esika mwasi mozangi kondima oyo azali koluka ko. . . ye. . . Nabosani



nkombo na ye sikawa; soki nakokaki kotánga nkombo na ye. Ye. . . Nazali kokanisa ba-nkombo mingi.

<sup>71</sup> Nazalaki kokanisa Miss Bikólo mokolo mosusu; nakosepela ete tózala na mosusu ya ndenge wana. Azalaki oyo akendekei na bisika ya milangwa pe abwakaki milangi ya whisky libanda, pe alongolaki bililingi pe nyonso wana. Mpo na nini mwasi ya ndenge wana akoki kotelema lelo te, oyo akokende kopasola bililingi wana ya basi bolumbu, baoyo bazali lokola ye moko, pe makambo ya ndenge wana? Baoyo wana, bazalaka lisusu te.

<sup>72</sup> Sikawa, kasi mwasi yango, mozangi kondima, oyo alobaki ete—ete “Biblia elongobani na mibeko likonzi te mpo na kotánga yango na biteyelo ya letá,” pe makambo ya ndenge wana.

<sup>73</sup> Sikawa, likambo bakómi lisusu kosala, soki bosili komona yango, bazali koluka koloba sikawa, pe bayekoli minene ya Makami, balobi ete “masakoli mingi oyo epésámáki na Biblia ezalaki mpenza ya lokuta, pe ekokisámá ata moke te.” Pe bosili koyoka makambo yango pe kotánga yango. Pe bazali koluka koloba makambo ndenge na ndenge; bomoni, bazali koluka koboma nguya ya Liloba yango. Soki bakoki bobele koboma pe kotia esika na Yango endimeli moko to eloko moko ya bato, oyo ekomonana na miso na bango malamau koleka Liloba, na ntango wana, bakoboma Yango ná mimesano ya bonkóko na bango—na bango. Pe na lolenge wana nde bazali koluka koboma Liloba na Nzambe, ezali na nzela na politiki ya bibongiseli.

<sup>74</sup> Sikawa, lingomba moko na moko ezali na politiki na yango moko. Lingomba ya Klisto ezali na yango, lingomba Baklisto ezali na yango, ba-Batiste, ba-Metodiste, ná ba-Presbiterien; bango nyonso bazali na ba-politiki na bango ekeseni. Sikawa, bakómi kotangwa na yango mpo bazali na bokabwani. Bomoni, ekokaki kosalema liboso te, basengeli kosala yango sikawa. Bomoni, oyo nde ntango ya kosangana, pe sikawa bazali kosangisa nyonso wana, kotia yango esika moko, pe tozali komona eloko nini bakozua na suka. Oh la la, ezali lokola kotumba lipa basangisi mosuni ya mpunda ná bosoto euti na ekúndé, ná biloko nyonso mingi koleka oyo esangisami; basali yango liboke, babakisi mbálá ya kopolá ná biloko mosusu, pe tálá eloko nini bakozua na suka. Na ntembe te, ngai nakolinga yango ata moke te. Te misie! Lolenge wana nde bazali kosala. Bomoni, bazali kozua bato oyo bandimaka ete Yesu azalaki lisapo, lingomba oyo endimaka ete Yesu azalaki lisapo; oyo mosusu, bamosusu bandimaka ete Azalaki Mosakoli.

<sup>75</sup> Moko alobi: “Ntango ya bikamwa esílá koleka.”

<sup>76</sup> Mosusu akoloba: “Ntango mosusu likambo yango ezalaka.”

<sup>77</sup> Pe bango nyonso oyo elongo, pe Biblia elobi: “Ndenge nini bato mibale bakoki kotámbola elongo soki bayokani te?” Bomoni? Sikawa, oyo wana nde lolenge ya bomoko bazali na yango. Pe bakotia tata mosantu monene moko likolo na yango,

pe wana nde bokozua elilingi ya nyama, ndenge mpenza Biblia elobi. Sikawa bazali na motei moko Luterien, ye nde motó na yango. Ee, tomoni ete ezali ntango ya kosangana. Ezali motindo moko sikawa, Communisme pe nyonso wana ekosangana; na mokili, na lingomba, ná nyonso wana, bakosangana.

<sup>78</sup> Bótala bokelamu. Oh! la la! Bokelamu, soki botali bokelamu, esalaka likambo yango moko. Bokelamu ezali manáká ya bilembo ya Nzambe. Boyebaki yango? Yesu ayebisaki bango ete bátálá bokelamu. Mai-na-mbu ekonguluma, bomoni, pe ekozala na makambo ndenge na ndenge, mabelé koningana bisika mingi, kowélana ya bikólo, bilembo na likolo, bilembo na mokili, bisika nyonso ekozala na bilembo ya makambo ekoya.

<sup>79</sup> Bótala mapata. Liboso mapata ékoka kopesa mbula makasi, boyebi ndenge nini esalemaka? Mapata ya mike-mike mingi esanganaka, ekómaka lipata moko monene. Ee, lipata oyo ekomemama na mwa mopepe, oyo mosusu ekomemama na mwa mopepe, pe mapata nyonso ekosangana, na sima, mbula makasi ekobeta. Bomoni? Esanganaka liboso ékoka kokóma mbula makasi; esengeli mpenza.

<sup>80</sup> Bótala mabata ya mbóka ná ya zámbe, basanganaka elongo liboso ya kotika ekólo na bango. Bomoni? Basanganaka elongo. Bokoki komona bango kopumbwa longwa na lobwaku oyo kino na lobwaku oyo kuna, longwa awa kino kuna, bango nyonso bazali kosangana. Bazali kosangana, komilengela mpo na kopumbwa. Bomoni, ezali mpenza. . . yango nde bokelamu, pe Nzambe moto akelaki bokelamu, pe bokelamu etambolaka kokokana na mwango ya Nzambe. Ezali mobeko, mobeko ya Nzambe oyo ekomami te, bokelamu esalaka yengebene na mobeko na Ye.

<sup>81</sup> Ezali lokola, koloba na matánga, likambo ya mai ya nzete oyo ekitaka kino na nkunda, na nse ya misisa ya nzete, mpo étikala kuna kino lisekwa, na eleko ya moi. Ezali mobeko ya Nzambe. Mayele ata moko te ekoki kosala ete mai yango ékita kuna; okoki kobenda yango te, okoki kobimisa yango te lokola miliki-ya-ngombe. Lolenge ya kosala yango malamú koleka ndenge Nzambe asalaka yango ezali te. Nzambe azali na lolenge oyo ebongi be. Na bongo, ntango nkása ekweyaka, na ntango wana Atindaka mai ya nzete na nse, kino na nkunda, pe Abombaka yango. Ndenge Yobo alobaki: “Bómbe ngai na nkunda kino nkánda na Yo ekoleka.” Bomoni? Ekitaka kuna na nse mpo ezali mobeko ya bokelamu, liboso malili makasi éya. Bótala ndenge nkasa ebandi kokweya sikawa. Mpo na nini? Ezali mobeko ya bokelamu.

<sup>82</sup> Mabata basanganaka, bango nyonso, pe bayáanganaka zingazinga na mokambi moko. Kuna, bayebaka na lolenge moko to mosusu, nayebi te ndenge nini basalaka yango, kasi bayebaka ete mwa libata-mobali wana nde azali mokambi. Pe mwa libata

yango, bango nyonso basanganaka pe bayanganaka mbala moko zinga-zinga na ye, pe bapumbwaka na likolo. Pe ako...ye abimá naino na lobwaku yango te, kasi akokende sémba mpenza kino na Louisiane to Texas, na bilanga ya loso. Bomoni, liboso bápumbwa, mpo na kotika ndako na bango, esika babotamaki na mobu wana, basanganaka. Amen! Yango wana mpenza; bayanganaka zinga-zinga na mokambi na bango.

<sup>83</sup> Mpo na moto, likambo ezali ete, ayebi mokambi na ye te. Iyo, misie. Bayanganaka zinga-zinga na ebongiseli, bayanganaka zinga-zinga na episkopo to moto moko, kasi bayanganaka zinga-zinga na Mokambi te, Molimo Mosantu kati na Liloba. Bomoni? Balobaka: “Oh, ee, nazali kobanga ete náková mwa bilandá-landa; nazali kobanga ete nálanda nzela ya mabe.” Ohhhh, yango wana mpenza! Bongo soki mwa libata moko alobaki: “Nasepelaka mpenza te ndenge abongisaka nsala na ye. Nandimi te ete nakolanda ye.” Okokufa na malili makasi. Okokangama kuna, soki opumbwe—soki opumbwe te, ntango ye akokende. Basanganaka, pe bokelamu nde esalaka yango.

<sup>84</sup> Mabata-ya-zámba esanganaka, eyanganaka zinga-zinga na mokambi na bango; basalaka ndenge moko.

<sup>85</sup> Bosílá komona ba-nzoi ntango epumbwaka elongo? Ba-nzoi esanganaka, liboso épumbwa, zinga-zinga na mwasi-mokonzi na bango. Ezali solo. Pe esika akokende, bango pe bakokende kuna. Iyo! Basalaka nini? Basanganaka liboso ya kopumbwa. Ya solo; bokelamu nyonso!

<sup>86</sup> Mbisi esanganaka liboso ya kosala mobembo ya eleko-ya-moi. Kuna na mbu monene, bokoki komona bango; baoyo ya minene...baoyo tobengaka “ya kúnki,” ba-saumon. Ntango bayáka kuna, liboso ya kosala mobembo, bokomona bango nkóto ntúkú na ntúkú, kuna na mbu yango, bayaka zinga-zinga moke-moke; na mai ya mungwa, kasi bazalaka mpenza mbisi ya mai ya ebale. Pe bayaka mbala moko awa na mai ya ebale, bananaka mpo na eleko ya kobota máki. Bananaka kuna pe babótaka máki, pene na mibu minei nyonso, pe bakufaka mbala moko, sima na kobota máki. Pe bayebaka ete bazali kokende kuna mpo na kokufa, kasi okoki kopekisa bango ata moke te. Bapumbwaka bibuteli ya mbisi pe makambo mosusu nyonso, wana bazali konana kuna, koyeba ete bazali kokende na bango kokufa. Kasi mobeko ya bokelamu etindaka bango, bayebaka ete esika bazali kokende kuna, bakobota máki na kati madusu, pe bakokufa. Pe bana babotamaka, na sima, eloko moko esangisaka bango, pe batiolaka kino na mai-na-mbu. Ezali kosangana! Ezali mobeko. Okoki kosala malamumu koleka mobeko ya Nzambe te.

<sup>87</sup> Bikólo ezali—ezali kopanzana, mpo tozali komona ete—ete sikawa ekómi ntango oyo basengeli kosala yango. Tozali na ntango ya mobulu kati na bikólo. Tozali komona ete bikólo ezali kokata boyokani. Mobu moko sima na mosusu, tozali komona

ekólo *oyo* komelama na communisme; *oyo* mosusu komelama na communisme. Pe awa, na ekólo na biso moko, etondi mpenza na communisme, pe ekozua bokonzi! Bomoni, ekosala yango, lolenge ya kopekisa yango ezali te. Mpo na nini? Ntina yango moko *oyo* bokokaki kopekisa Titus te. Bato baboyaki Nzambe ná Liloba na Ye. Iyo, misie, bongo, bakosala yango, pe tozali komona ete ezali na nzela.

<sup>88</sup> Ngai, na momesano, nazuaka ngonga mibale to misato; kino sikawa, nasili kozua pene na miníti ntuku misato. Bomoni? Kasi mpo na kopesa nyonso *oyo*, nazali mpenza kosala mbangu. Bóyekola yango ntango bokokóma na ndako.

<sup>89</sup> Bótala, bazali sika-sikawa kosangana. Bokoloba: “Ndeko Branham, ezali ya solo?” Bazali kobéléma na Etumba ya Alamakendo; ezali yango mpenza nde bakosala. Bomoni? Pe bazali kosangana mpo na yango sikawa. Yango nde ntina tozali na O.N.U. ná nyonso *oyo* tozali na yango. Bikólo ya Westi ezali kosangana mpo na kotelemela Bikólo ya Esti, communisme pe bongo na bongo, bango nyonso bazali kosangana. Mangomba ezali kosangana. Emonani éte makambo nyonso ezali kosangana. Ezali kosangana, kosangana, tozali komona yango.

<sup>90</sup> Lisusu, na ntango ya kosangana nyonso *oyo* ya ekólo, bilembo *oyo*, bilembo ya ekólo, tozali komoma awa na mokili, mabelé ezali koningana na bisika ndenge na ndenge, makambo ndenge na ndenge ezali kosangana; bazali kosangisa mokili, kosangisa bato, mangomba nyonso elongo, makambo *oyo* nyonso. Pe ntango *oyo* kosangana nyonso *oyo* ezali kosalema, kosangana mosusu ezali kosalema. Amen! Yango nde likambo nalingi kotalisa bino sikawa.

<sup>91</sup> Nzambe azali kosangisa Mwasi na Ye ya libala. Azali kosangana, longwa na Esti, na Westi, na Nordi pe na Sudi. Ezali ntango ya kosangana, pe ezali kosalema sikawa. Azali kosangana mpo na nini? Konetolama. Amen! Nzambe azali kobongisa Ye. Iyo misie, kosangana! Azali kosangana ná nini? Ná Liloba! “Mpamba te likoló nyonso ná mabelé ekoleka, kasi Liloba na Ngai ekoleka ata moke te.” Azali kosangana Ye moko ná YANGO ELOBI NKOLO, ata ebongiseli nini to moto nani alobi likambo nini. Azali kosangana Ye moko. Azali komilengela. Mpo na nini? Azali Mwasi-na-libala. Ezali solo. Pe Azali kosangana Ye moko ná Mobali na Ye ya libala, bomoni, pe Mobali-na-libala azali Liloba. “Na ebandeli ezalaki Liloba, Liloba ezalaki elongo na Nzambe, pe Liloba ezalaki Nzambe. Pe Liloba ekómaki nzoto pe efandaki elongo na biso.”

<sup>92</sup> Pe Lingomba ná Mwasi-na-libala ná Liloba bazali kokóma mpenza moko, kino Liloba Yango moko ezali kosala misala ya Mobali-na-libala. Amen! Bozali komona yango? Kosangana! Ezali lisusu te: “Bókota na lingomba”; ezali lisusu te likambo ya *boye*, kasi bókima makambo nyonso pe bókangama na Yesu

Klisto. Bomoni? Ezali ntango ya kosangana. Nzambe azali kosangisa Mwasi na Ye ya libala, Azali kozongisa Ye; ya solo mpenza. Azali kosangisa Maloba ya elaka na Ye.

<sup>93</sup> Batesaloniki ya Mibale, mokapo ya 2; Elobi, na mokapo ya 5: “Basantu oyo balali na putulu ya mabelé bakolamuka. Na sima, tokosangana elongo na bango (baoyo bazali na bomoi, ná baoyo bakúfá), tokosangana liboso tókóma mpenza Kuna,” mpo Mwasi-na-libala akozala mobimba ntango Akokóma Kuna. Baoyo bazali na bomoi, baoyo bazali kosangana ná Liloba, pe baoyo basílá kokende basílá kosala yango; pe Bango nyonso bakoya elongo, bakosala lisangá moko monene ya kosangana liboso ya komata Kuna. Amen!

<sup>94</sup> Communisme esengeli kotelema, makambo mosusu oyo esengeli kotelema, pe lingomba esengeli kosangana kuna, ntango wana . . . pe bikólo oyo kuna, mpo na Lisanga ya Mangomba ya Mokili; pe Mwasi-na-libala asengeli kosangana Ye moko na nsé ya Liloba na Nzambe. Mpo na kosala yango, Nzambe atindaki elembo ya Likolo ná makambo mpo na kondimisa Lingomba, ndenge Asalaki mpo na ekólo. Amen.

<sup>95</sup> Nzambe; ntango ya kosangana! Iyo, misie. Oh! la la! Sikawa, bómikanisela sikawa, kosangana ya Liloba (kosangana lisusu), ezali kozongisa “Kondima oyo epesamaki na basantu mbala moko mpo na libela.” Kozongisa! Likambo oyo ekokaki kosalema bobele na eleko oyo. Ntango bobele moko oyo ekokaki kosalema ezali sika-sikawa. Ebundísamaki ata moke te esika mosusu; balandaki boléma ya bibongiseli. Kasi sikawa, ezali lisusu likambo ya kolanda boléma ya bibongiseli te, mpo ezali ntango ya kosangana ya mibali pe basi ya libota nyonso, lángi ya loposo nyonso, bindimeli nyonso, makambo nyonso na nse ya Klisto, na nzela ya Libatisi ya Molimo Mosantu pe kozonga na Liloba.

<sup>96</sup> Ntango ya kosangana mpo na Lingomba! Oh! la la! Kosangisa Liloba nyonso oyo bibongiseli epanzaki bisika nyonso: kobanda ntango ya Nicée, na Roma, ntango bakómisaki lingomba ya liboso ebongiseli, pe bakómisaki Luther ebongiseli, bakómisaki Wesley ebongiseli, bakómisaki mangomba mosusu nyonso bibongiseli. Pe mpo na kosala yango, basengelaki kondima bindimeli, na sima, ntango Nzambe atindaki eloko mosusu, bakokaki koyamba Yango te. Yango wana ekokaki kosalema te kino ntango oyo. Pe Nzambe alakaki ete, na mikolo ya suka, “Kondima ya batata ekozongisama lisusu na Mwasi na libala,” ete ekosalema boye, pe ekokaki kosalema na ntango mosusu te bobele na ntango oyo. Bótala elembo nini longwa na Likolo, lokola Likonzi na Móto oyo eteleme katikati na biso, ná bilembo pe bikamwa ya Nkolo Yesu Klisto. Pe ntango Alobelaka biso, ezangaka ata moke te kokokisama ntango nyonso na kobonga be. Amen! Na boye tomoni esika nini totelemi. Ntango ya kosangana!

<sup>97</sup> Tozali komona bikólo kosangana, tozali komona mokili kosangana, tozali komona communisme kosangana, tozali komona mangomba kosangana; pe tozali komona Nzambe kosangana Ye moko ná Mwasi na Ye ya libala, kino Ye ná Lingomba bazali eloko moko. Aleluya! Ezali lokola pyramide oyo kuna. Ya solo! Kosangana elongo; Nzambe azali kosangana! Mpo na nini? Esalémá naino te liboso, kobanda eleko ya lingomba ya liboso, ete Likonzi na Móto ézala elongo na bato. Esalémá naino te liboso, kobanda eleko ya lingomba ya liboso, ete bato bámona makambo tozali komona lelo. Pe likambo oyo ekokaki kosalema bobele ntango Nzambe atindaki Bilembo Nsambo pe apesaki biso elembo moko na nzela na Yango, Atindaki Banje nsambo longwa na Likolo; pe Ayaki mpo na kozongisa Liloba oyo bibongiseli epanzaki, pe asangisaki yango lisusu kati na Liloba na Nzambe, mpo na kokitisa Molimo Mosantu na Ye.

<sup>98</sup> Yesu alobaki: “Soki bokoumela kati na Ngai pe Maloba na Ngai ekoumela kati na bino, na bongo, bósenga likambo nini bolingi, yango ekopesamela bino.” Azali kosanganisa lisusu Mwasi-na-libala ná Liloba, oyo ezali Nzambe. Lingomba ná Liloba, ezali te Lingomba ná endimeli, kasi Lingomba ná Liloba; Mwasi-na-libala ná Liloba basangani. Oh! la la! Ezali nini. . . Kozongisa nini? Kondima ya batata ya pantekote ya ebandeli, bomoni, oyo etóngá ya Luther epanzaki. Luther ye moko te; Luther te, Wesley te, babandisi minene wana te. Kasi, sima na bango kokende, lingomba moko ebimaki, pe bango. . . makambo basalaki na ntango wana ná yango, bakómisaki yango ebongiseli. Bayambaki bindimeli pe bongo na bongo, pe bakendeki mosika mosika mpenza. Bongo, bótala bango lelo, sikawa basili kokóta na Lisangá yango ya Mangomba ya Mokili.

<sup>99</sup> Sikawa, bomoni, kasi na mikolo ya suka, bomoni, tozali sikawa komona kosalema makambo oyo esalémá naino te liboso. Bomoni, ezali elembo ya Nzambe, pe kosangana nyonso oyo ezali elembo ya ntango. Sikawa tolingi kokóta na yango na bokebi nyonso mpo na koyeba na bosóló ete tosósóli yango. Kotika. . . bazali kotika Liloba ya solo mpo na bibongiseli; mpo na koyamba bindimeli pe makanisi ya bato ndenge na ndenge, esika ya kozua Liloba.

<sup>100</sup> Emoniseli 10 elobi: “Nsango ya mwanje ya nsambo.” Sikawa bómikanisela, ezali mpenza na ntango ya Kelelo Nsambo, pe ezali na banje nsambo oyo bayuli Kelelo Nsambo. Yango nde tokomona mbala na sima. Kasi bómikanisela, esika nini, na lolenge na yango moko, Elobami: “Mwanje. . .,” ezali Kelelo ya mwanje na nsambo te, kasi “Nsango ya mwanje na nsambo.” Bomoni, mwanje ya Kelelo te, mwanje ya Nsango! Bomoni, mwanje ayulaki bobele Kelelo, mwanje ya nsambo yango, mwanje ya Kelelo. Kasi oyo elobi: “Na mikolo ya Nsango ya mwanje na nsambo,” bomoni, ntango Nsango na ye ekokisami.

Bomoni, oyo ezali Nsango ya eleko ya lingomba. Na ntango oyo, na ntango wana ako. . . Nsango, Kelelo te, pe “libombami ya Nzambe (oyo ekomami na Liloba) ekokokisama.”

<sup>101</sup> Sikawa, bótala mokolo nini tozali kobika na yango! Bótala Bilembo yango, yango nde esangisaki Liloba na Nzambe oyo epanzanaki, makambo oyo Luther ná bamosusu nyonso, makambo oyo ba-reformateur minene oyo bakendeki liboso, ezongisami pe etalisami kati na Biblia, esika oyo esengelaki kozala; moto nyonso na esika na ye mpenza, likambo nini moto akosala pe eloko nini ekosalema na lingomba; likambo nini moto mosusu akosala, pe eloko nini ekosalema na lingomba; makambo nyonso oyo atikaki pembeni. Na boye, na eleko ya suka, ntango toyebaki ata eloko moko te, elobámáki na biso liboso, ete likambo moko ekosalema; ekomámáki ata na bazulunále pe nyonso wana, pe Akiti mbala moko, amonisi yango pe asangisi mabombami yango nyonso. Amen! Ndeko, mpo na ngai, ezali likambo monene! Likambo yango, mpo na ngai, etii Liloba na molongo mpenza. Amen! Nalandaka na ngai te makambo—makambo, to, nalandaka makambo bato balobaka, bakanisaka, ezali malamumu, kasi mpo na ngai, ezali Solo.

<sup>102</sup> Lokola banganga-minzoto, oyo bautaki na Babilone, babélélaki koloba: “Wapi Ye, Mokonzi ya Bayuda oyo abotami? Azali na mokili sasaipi. Tosengeli komona Ye.” Ezali solo. Pe nandimi ete Asili kobéléma mpenza mpo na koya pe nakoki koloba: “Tala, Mobali-na-libala azali koya! Nayoki mbéla ya minwí!” Amen! Tokómi mpenza na ntango ya suka. Oh! la la! ngonga nini tozali kobika na yango. Bótala. Bomoni?

<sup>103</sup> Mokolo nini oyo! Ntango nini tozali kobika na yango, ntango oyo libombami monene ya Nzambe ezali kokokisama; ezali kolakisa Bonzambe, kotalisa nini Yango ezali; lolenge nini b-isme ya mike-mike oyo, nde etángwisaki bato na nzela pe ekómisaki Ye *boye*, moto moko akómisaki Ye *boye*, pe moto mosusu akómisaki Ye *lolenge wana*. Kasi Mwanje na Nkolo akitaki pe amonisaki ba-isme na bango nyonso, Abimisaki Solo longwa na yango pe Atalisaki Yango polele. Pe Yango wana, ezali ya kobonga be mpenza, nzela mosusu ezali te. Yango wana nde Ye azali. Bomoni, momboto ya nyoka, makambo ndenge na ndenge nyonso oyo—nyonso oyo ebómbamaki mpenza makasi mpo na bato. Bomoni? Ezali nini? Azalaki na. . . Oyo ezali elembo ya eloko nini? Esengeli kosangana!

<sup>104</sup> Alobaki nini na Malaki 4? Akozongisa! Akozongisa Kondima ya nkitélá ya ebandeli, ekozongela bato, ná Nsango yango moko ya nkitélá, elembo yango moko ya nkitélá, ndangá yango moko ya nkitélá, Nzambe yango moko, Nguya yango moko, malakisi yango moko, makambo nyonso mpenza, ná kotatolama ya Likonzi na Móto yango moko, oyo ekweisaki Saulo na nsé, na nzela ya Damaseke, ezali elongo na biso lelo, ezali kosala makambo yango moko oyo Asalaki na eleko wana. Kosangana!

<sup>105</sup> Tozali komona bikólo kosangana, tozali komona mokili kosangana, tozali komona mangomba kosangana. Tozali komona Mwasi-na-libala kosangana, kosangana ná Liloba. Mpo na nini? Liloba ezali Nzambe. Pe lokola Liloba. . . Lokola Mobalina-libala (azali Liloba), pe Mwasi-na-libala (azali moyóki ya Liloba), basangani na Bomoko. Basangani lokola na libala. Bomoni, bazali komilengela mpo na libala, pe ba—bakómi eloko moko. Liloba ekómi bino, bino bokómi Liloba. Yesu alobaki: “Na mokolo wana, bokoyeba yango. Nyonso oyo Tata azali, Ngai nazali yango; pe nyonso oyo Ngai nazali, bino bozali yango; pe nyonso oyo bino bozali, Ngai nazali yango. Na mokolo yango bokoyéba ete Ngai nazali kati na Tata, Tata kati na Ngai, Ngai kati na bino, pe bino kati na Ngai.” Bomoni? Na “mokolo yango.” Mokolo nini? Lelo! Tozali komona mabombami ebombámá minene ya Nzambe ezali komonisama. Oh, nalingaka yango mingi!

<sup>106</sup> Oh, bótala ndenge zebe ná Liloba ekoki kokokana te, ndenge basáláka lelo. Bakokaki kosala yango liboso te. Ezali bobele sikawa nde bakoki kosala yango.

<sup>107</sup> Bótala, Alobaki: “bilembo ya likolo, bilembo ya likolo.” Zebe ná bilembo ya bikólo; sikawa, bazali na bilembo minene na likolo lelo, bazali na ba-astronaute pe nyonso wana. Kasi ba-astronaute yango bazali kosala nini mpo na eleko? Ezali kopesa bato nsómo. Bayebi te ntango nini bakoki kotinda eloko ya ndenge wana na likolo mpo na kobwaka ba-bombe, pe tokozala lisusu te. Bomoni? Sikawa, yango nde bilembo oyo bazali na yango, makambo ya nsómo ya kotala-na-miso na likolo. Bomoni? Bazali na yango, ba-missile atomique pe nyonso wana, bilembo ya ndenge na ndenge.

<sup>108</sup> Bomoni esika nini batiaki loboko na mo—mokandá wana, mokolo wana, ete bakobwaka lisusu ba-bombe te na mabelé, kasi sikawa bakokende na nsé ya mai pe na nsé ya mabelé, bobele mpo na komeka yango ndenge moko. Bomoni? Batii loboko na mokandá: “Tokosala boye te, soki bolobi ete bokosala yango te (kasi tokozonga epai na biso pe tokosálá yango boye; wana toyebi ete bozali kosala lolenge moko kuna).” Bomoni? Ezali na eloko moko te, ezali bobele. . . bandimanaka ata moke te kati na bango, ezali na eloko moko—eloko moko te. Bokoki. . . Bomoni? Pe bango nyonso, babánganaka bango na bango. Ezali elembo ya nsómo.

<sup>109</sup> Zebe, ná moto ná bikólo esili kobimisa elembo ya nsómo na likolo. Ezali solo mpenza. Sikawa, bazali kobángana kati na bango. Pe ezali na elembo moko ya likolo oyo epesamaki na. . . Bomoni sikawa, bango pe bazali na elembo moko na likolo, elembo ya nsómo, moto kati na astronaute; akoki kozala na missile atomique, pe akoki kobwaka yango mpo na koboma ekólo mobimba. Akoki komata likolo lokola astronaute pe kotikala kuna. Eloko moko te ekoki kopekisa bango kosala



yango. Na ntembe te, bakoki kosala yango, bango. . . ntango nyonso bakolinga. Bakoki kokómisa yango putulú soki balingi, kasi. . . na miniti zomi na mitano ekolanda. Pe likambo moko akoki kosala, oyo mosusu pe akoki kosala bongo. Boye, bomoni ete bazali na elembo, kasi lolenge ya elembo yango ezali kobangisa bango.

<sup>110</sup> Bazali kosangana, bazali kosangisa makasi na bango. Bikólo ya bonsomi, bazali kosangisa makasi na bango. Communisme ezali kosangisa makasi na bango ná Russie. Bango nyonso; kasi bamoko bazali kobanga bamosusu. Bomoni, ezali elembo ya kobangisa. Ezali solo. Oyo wana ezali bilembo ya bikólo, pe nyonso wana.

<sup>111</sup> Kasi Lingomba esili kozua Elembo moko ya Likolo: Astronaute moko! Amen! Yesu Klisto, na lolenge ya Likonzi na Móto; Oyo Ye azalaki na Kondimana ya Kala, Oyo Ye azalaki ntango Akutanaki na Saulo kuna, na nzela ya kokita kuna na Damaseke, Yesu yango moko azali awa lelo! Pe Yango ezali kosala nini? Ezali kopesa nsómo? Ezali kopesa bolingo, kosangana kati na biso. Amen! Kozala na bolámu moko mpo na mosusu. Epesaka Bolingo ya Nzambe, oh, kosanganisa biso pe kotia biso, Nzoto ya Klisto, na bomoko lokola Mwasi-na-libala. Yango nde eloko ezali kopesa sikawa, kosangana monene oyo Nzambe. . .

<sup>112</sup> Bango bazali kosangana, etónge moko *awa* mpo na kobundisa oyo mosusu, etónge moko *awa* mpo na kobundisa oyo mosusu. Awa lingomba etelemi katikati na bango; bótala malamú likambo nini ekosalema: ekosangana ná bango. Ezali solo mpenza. Kasi, sikawa, tomoni ete likambo yango ezali kopesa nsómo pe yikíyiki.

<sup>113</sup> Kasi Lingomba, Mwasi-na-libala, azali kosanganisama na Nzambe moko, na nse ya Molimo moko, Molimo ya Nzambe, kati na Lisangá mosantu ya Nzambe moko, mpo na kozala Mwasi-na-libala ya bulee moko mpo na Nzambe. Ezali solo, yango nyonso elongo; bomoko ya Nzoto. Nzoto ezali kozela, lokola Mwasi-na-libala; lokola—lokola ezali Mwasi-na-libala, lokola tomibengaka Mwasi-na-libala. Mpo ntango ya kosangana ya Mwasi-na-libala, Lingomba ezali kosangana makasi mpenza. Esengelaki kokela mpenza bolingo kati na biso, ete tókoka kokabwanaka mpenza na mpasi na motema. Ezali solo. Ntango oyo yo, okosengela mpenza te kobémbelisa bato mpo na kobóndela, okosengela mpenza te kobémbelisa bango mpo na kokumbamela Nzambe, okosengela mpenza te kobémbelisa bango mpo na kosala makambo ya malamú. Bakozala mpenza na bolingo mingi ná Ye, kino eloko mosusu ekozala na ntina moko te.

<sup>114</sup> Bokanisi nini mpo na elenge mwasi, elenge mwasi ya kitoko mpenza, oyo alingi kobala elenge mobali ya kitoko, oyo ye alingi mingi koleka mpenza, likambo yango ezali na ntina mingi mpo

na ye, koleka bomoi na ye moko, pe ayebi été, kala mingi te, bakobálana? Wana mokolo ya libala yango ezali kobéleme, elenge mwasi yango, nayebisi bino, “akofanda” lisusu kimia te. Bomoni? Akobongisa makambo nyonso; akomipesa mobimba na ye. Ezali solo. Eloko nyonso oyo ekosepelisa mobali, yango nde akosala. Ee, yango nde esengelaki kozala lolenge ya Lingomba lelo, été bomoi na biso esengeli kobómbama mpenza kati na Nzambe na nzela ya Klisto, esili kotiama elembo na kati, na Molimo Mosantu.

<sup>115</sup> Likambo nazali kolakisa bino awa, ezali mpo na kolobela bino likolo na bilembo pe makambo ndenge na ndenge oyo ezali kosalema, nazali na ntango ya kosala yango sikawa te; nakosala yango na liteya mosusu, soki Nkolo alingi. Kasi ezali na eloko moko ya moke oyo ezali naino kozanga na Lingomba. Tolingi yango, kokóma na yango, pe nakómi mpenza pembeni na yango sikawa. Bomoni? Tolingi kokóma na likambo yango, soki... bosengeli kosala yango. Soki bosali yango te, esili, bosengeli kosala yango. Mpamba te, bótala, ntango ya kosangana ekómi pene, mpo Nzambe azali kosanganisa Lingomba mpo na—mpo na Konetolama, kokende na libala mpo na Bosangani Monene: ntango Nzambe ná moto bakosangana mpo na Seko-na-seko, ntango bikelamu ya ntango ekosangana ná Seko-na-seko.

<sup>116</sup> Esalemaki mbala moko na lolenge ya Mwana na moto awa na nsé. Pe Asengelaki kopesa Bomoi na Ye mpo na kopesa nguya, mpo na kosanganisa bato mosusu ná Nguya yango moko, mpo na Mwasi-na-libala ya Yesu Klisto. Pe sikawa Lingomba ezali Komisangana ná Nzoto ya Klisto. Esili Komikangola, Ekabwani na minyololo mike-mike nyonso, Ezali komilengela; Ezali kosangana, bosangani kati na bango; oh, bolingo pe esengo, pe Molimo Mosantu azali kosala mosala kati na bango. Oh! la la! ntango nini oyo!

<sup>117</sup> Ndenge tomonaka mabata-ya-mboka komilengela, tomonaka maswéswe komilengela, tomonaka banyama... ba-nzoi komilengela, tomonaka mapata komilengela mpo na mbula, tomonaka makambo nyonso; ndenge esanganaka mpo na etumba monene na yango. Tozali komona Lisangá ya Bikólo, ya bikólo esangani, kosangana kati na communisme. Tozali komona bango kosangana awa, na Mokili ya Westi. Tozali komona mangomba kosangana, baoyo mosusu nyonso. Na bongo ekoki kosalema ata moke te, ekokaki kosalema boye na eleko mosusu te; ekokaki kozala boye te na mibu ntuku mibale oyo eleki, ekokaki kozala boye te. Ekokaki kozala boye te na mibu zomi oyo eleki, esengelaki kosalema sika-sikawa. Bomoni, mpo ba-ismes ná nyonso oyo ekómaki naino esika yango te.

<sup>118</sup> Sikawa, bólamuka! Bóningisa nzoto, noki-noki, pe bótala awa, esika nini tokómi! Tokómi wapi? Lokola bato na mayele oyo wana, tozali mpenza na molongo ná Liloba na Ye, pe Pole ya Nkolo ezali kongengisa nzela-moke na biso. Nkembo

na Nzambe na bisika bileki Likolo. Nkembo na Nzambe Oyo apesaki biso Yesu Klisto, Oyo tolingaka pe akomisi biso esika oyo. Pe wana biso . . . Tozali libota na Ye, tosómbami na motuya ya Makila na Ye.

119 Oh! la la! Wana ntango ya kosangana ekómi, tozali kotala, wana tozali kosangana kati na biso na bikanganelo ya Molimo na Ye, biso . . . Ekoki kozala Molimo na Ye? Na ntembe te, Ezali Molimo na Ye. Mpo na nini bongo? Ezali Liloba na Ye, pe Azali . . . yango ezali Molimo ya Liloba. Pe ntango Molimo ya Elaka yango eyei likolo na yo, Ekotatola pe ekomitalisa awa, Ezali Molimo yango moko? Ezalaki Ye oyo azalaki na Mose na biliki! Ezalaki Ye oyo azalaki likolo na Yesu Klisto! Azali Ye oyo akutanaki na Saulo na kokende na ye na Damaseke! Azali motindo moko lobi, lelo pe libela! Pe Azali kosala ndenge moko!

120 Pe tozali komona bikólo elongo, tozali komona bakonzi ya mangomba elongo, tozali komona communisme elongo, tozali komona ba-isme kosangana, tozali komona makambo nyonso oyo; pe sikawa tozali komona Mwasi-na-libala kosangana ná Liloba. Oh! la la! Ntango ekoki oyo basantu basengeli kosekwa, mpo na kosangana na baoyo bazali na bomoi, mpo na kokende kosangana ná Yesu Klisto mpo na Seko-na-seko.

121 Tika ete Nzambe ásungu biso, moko na moko, mpo na kosangana ná Klisto na mpokwa oyo, tótika nyonso oyo tozali, nyonso oyo tozali na yango, mobimba na biso, bomoto ya kati, nzoto pe makanisi, na Yesu Klisto, pe tózela ntango ya kosangana yango.

Ntango kelelo ya Nzambe ekoyula, pe ntango ekozala lisusu te,  
Pe ntango ekotána Seko, kogenga pe kitoko;  
Ntango bakufi kati na Klisto bakosekwa pe bakoyangana kuna, na ngámbo mosusu (ná Mwasi-na-libala oyo azali na bomoi), mpo na konetolama elongo.

122 Bótala kosangana yango! Nzambe azali kosanganisa Lingomba ná Liloba na Ye, Liloba ná Lingomba, mpo bango mibale bákóma motindo moko: “Lobá *boye*, pe ekosalema. Sálá *boye*, pe ekosalema. Yango oyo; oyo nde Ngai liboso na yo, oyo nde Ngai nazali kondimisa yango; oyo nde Ngai elongo na yo.” Malamu.

123 Tomoni ete sikawa ntango ekoki mpo Kelelo éyula, pe basantu oyo baláli kuna, baoyo bakoki kobonga be te zángu biso; bazali kotalela biso (Baebele 11); pe ntango bakoyángana, bakosangana ná baoyo bazali-na-bomoi. Lingomba ezali kosangana ná Liloba, na boye Lingomba ná Liloba ezali kosangana elongo, kokóma eloko moko. Basantu bakúfá ná basantu ya bomoi bakosangana mpo na kokóma eloko moko; pe

bango nyonso elongo bakokende kosangana ná Klisto kuna, mpo na Elambo ya Libala ya Mwana-mpate.

<sup>124</sup> Ezali ntango ya kosangana, pe bilembo ezali komonana bisika nyonso. Bilembo ezali kati na bikólo, bilembo ezali kati na communisme, bilembo kati na Bikólo ya Westi, bilembo kati na Lisangá ya Mangomba. Pe Elembo ezali awa na mpokwa oyo na mosala ya Molimo Mosantu, pe Liloba na Nzambe ezali kotátola yango pe kotálisha ete ezali Solo. Amen! Ntango ya kosangana! Elembo ya Ntango ya Kosangana!

Tógumba mitó.

<sup>125</sup> Nkolo Yesu, motema na ngai mpenza ezali kopumbwa na esengo, wana nazali komona makoki, mpo na ngai, moto oyo akóli, kasi ata bongo, makoki mpo na ngai ya komona Yo koya na ekeke oyo; kozala na bomoi pe kozala awa, pe komona ntango Kelelo yango ezali koyula: “Tika ete moto na mbindo ákóma lisusu mbindo. Tika ete moyengebene ákóma lisusu moyengebene. Tika ete mosantu ákóma lisusu mosantu.” E Nkolo Nzambe!

<sup>126</sup> Pe kokanisa ete lokola tozali awa, na mwa ntango mokemoke, na kobeta ya liso, ntango mokili ekoyeba te likambo nini ezali kosalema, kasi na mbala moko, bokomona komonana liboso na bino, balingami na bino oyo basílá kokufa, bakoya lisusu kosangana ná bino. Pe tokobongwana na mwa ntango mokemoke, na kobeta ya liso; pe tokonétolama, elongo, mpo na kokutana na Nkolo na biso na mipepe. Na bongo tokosangana ná Ye, pe tokozala kuna libela-na-libela, pe tokozala lisusu ata moke te mosika na Bozali na Ye.

<sup>127</sup> Ezali mpenza likambo monene lelo, Nkolo, koyeba ete, sikawa, tosangani ná Molimo moko. Molimo moko, Molimo Mosantu, oyo Asimbi mpenza Liloba na loboko, ayei kati na biso. Pe likambo monene nini oyo, ezali mpenza litómba ya kokabwana na nyonso ya mokili, mpo na kosangana biso moko ná Yesu Klisto. Pe kokanisa ete mokolo moko, na lolenge ya nzóto, ná nzóto lokola nzóto na Ye moko ya nkembo, tokofánda na mésa, na Elambo ya Libala, pe kuna, tokosangana pe tokobalana ná Ye; mpo na kobika lokola Mwasi-na-libala ná Mobali-na-libala, na ntango nyonso oyo ekoya, kati na Seko na Seko ezángá suka.

<sup>128</sup> Nkolo Nzambe, tika ete likambo oyo ézala bobele likanisi ya lisapo te mpo na bato, kasi tika ete ékóma mpenza likambo ya sóló, kino nzala pe mpósa makasi ékota kati na bato, mpo bango. . . batángaka ba-zulunále, batáláka. . . bayókaka radio ná ba-nsango, pe bámona ete ezali ntango ya kosangana. Bilembo ezali kongengisama.

<sup>129</sup> Nkolo Nzambe, ndenge tolobaki mpo na basi, makambo nini bakosala na ntango ya suka; makambo nini lingomba ekosala na ntango ya suka; pe Bileko ya Lingomba ekozala nini, pe

Bilembo ekozala nini, ná makambo mosusu nyonso oyo. Pe tozali komona makambo esalemaki na ntango ya Nowa. Tozali komona makambo esalemaki na ntango ya Sodoma pe Lóta, ntango Mwanje na Nkolo Amitalisaki na nzoto ya moto, aliáki mosuni ya ngombe pe ameláki miliki ya ngombe, pe aliáki lipa; azalaki wana pe akokaki koloba makambo ezalaki kosalema sima na Ye. Pe Yesu alobaki ete likambo yango moko ekosalema na boyei ya Mwana na moto.

<sup>130</sup> Nkolo Nzambe, tomonaki pyramide, ndenge totongáki yango kuna, tomonaki ndenge tozalaki kobakisa makambo likolo na yango; pe tomoni ete tokómi na ntango ya suka, tozali kozela Mokonzi, Libángá ya Litúmu. Nkembo na Nzambe! Tobondeli, Tata, ete Ólamusa bato, noki-noki sikawa, pe Ósangisa biso elongo, na bolingo ya bulee pe na limemia mpo na Yesu Klisto pe kati na biso.

<sup>131</sup> Soki ezali na moto moko awa na mpokwa, oyo ozangi elikia yango kati na yo, okoki kotómbola loboko epai na Nzambe pe koloba: “Nkolo Nzambe, sangisa ngai na Yo, sanganisa ngai ná Yo?” Nzambe ápambola yo, ndeko mobali. Nzambe ápambola yo, ná yo, yo; iyo. “Sanganisa ngai na Yo, Nkolo.” Iyo! Oh! la la!

Bikólo ezali kopanzana, Yisalaele ezali kolamuka,

<sup>132</sup> Bótala Yisalaele kuna, basili kosangana. Yisalaele, longwa na mokili mobimba, bayaki mpo na kosangana; mpo na komisangana, pe sikawa bazali ekólo. Bazali ekólo esangani: ná bendele na bango moko, misolo na bango, mampinga na bango, makambo nyonso; soki basilá kozala bongo, bazali bongo sikawa. Yisalaele esangani, Roma esili kosangana, lingomba esili kosangana. Pe Mwasi-na-ibala azali kosangana, amen; ná boyei ya Bosangani Monene wana. Ezali nini? Yango nyonso ezali kokende kino na Elembo wana, Elembo monene ya motuya wana, Yesu ná Mwasi na Ye ya libala bazali kosangana lokola eloko moko.

<sup>133</sup> Tata, Nzambe, pésa mapamboli oyo nasengi mpo na bato oyo, pe tika ete tósangana ná Yo na motema pe molimo, wana batomboli maboko, mpo na kotalisa ete bazali na mposa na yango. Nkolo Nzambe, pétola biso pe kómisa biso baoyo ya Yo; kokisa yango, Nkolo. Yango nde nyonso biso toyebi pe tokoki kosala, ezali kosenga. Na boye, Yo olobaki ete soki tosengi yango pe tondimi yango, tosengeli kozua yango; nazali kozela yango, Nkolo. Natondi Yo na Nkombo na Yesu Klisto. Amen.

Nalingi Ye, nalingi Ye,  
Mpo Alingaki ngai liboso,  
Pe Asombi lobiko na ngai  
Likolo na Ekulusu. (Amen. Oh! la la!)

Tálá, Mobali-na-libala azali koya!  
 Nazali koyoka mbéla ya minwí!  
 Tokomata ná koganga ya esengo, soki biso  
 nyonso totelemi ngwi,  
 Pe tokokutana ná Ye na likolo.

Sénzela pe bondela, ndeko na ngai,  
 Mpo moto moko ázua motóle na yo te,  
 Mpo mozángi móto pe malili ná mozóngi sima  
 Akozángá kolátisama elamba ya libala.

<sup>134</sup> Ezali solo. Tómilengela mpo na mbéla oyo ya minwí. Ekoya na ngonga oyo bokokanisa te. Mbéla moko ekoyokana, kati na bazangi kondima te; ekozala sekelé. Kasi bandimi, baoyo bazali kozela likambo oyo, bokomona minzoto koyá na molongó? Bomoni? Epésaki nini? Bobele ndenge esalaki mbala ya liboso. Bomoni, tosili kokóma wana, bilembo ezali koya.

Tomoni bilembo ya Boyei na Ye epámbolámá,  
 Tálá, nkasa ya mowiti ebandi sikawa kobima  
 ya sika;  
 Nsango malamumu ya Bokonzi ekei na bikólo  
 nyonso;  
 Pe tokómi pene, suka ekoki komonana.

Bongo, na esengo, tokei kopanza Nsango ya  
 komonana na Ye epambolámá,

<sup>135</sup> Ezali solo? Oh, kopanza Nsango ya komonana na Ye epambolámá! Yango nde tosengeli kosala. Koyebisa moto nyonso: “Mílengela, míbongisa mpo na kokutana na Nzambe.” Amen! Nalingi Ye. Oh, nalingi Ye mingi. Sikawa, tótelema sikawa. Wana tozali kopesana mbote, baluka, pésa moninga mbote ya loboko pe lobá:

Kino tokokutana! (Bópesana mbote ya loboko  
 sikawa.) . . tokokutana!  
 Kino tokokutana na makolo na Yesu;  
 Kino toko . . .

Kobosana te, okoki kozua mbéla. Liyangani na biso ya sima ekoki kozala na makolo na Ye.

E Nzambe ázala na yo kino tokokutana lisusu!

<sup>136</sup> Sikawa, bókanisa naino, liboso tókutana lisusu; liboso tókutana mokolo ya lomingo na ntongo, to mokolo ya misato na mpokwa, ekoki kosalema ete . . na mbala moko, moto moko amonani te. Moto songolo amonani te, pe bakei. Oh, kanisa naino soki mobali na yo amonani te, to mwasi na yo amonani te, pe—pe mwasi ya Yoane amonani te, pe—pe—pe awa, bana bamonani te. Nyonso esalamaki (likambo nini esalamaki?), na boye, osili kotikala!

Oh, bato balelaki pe baliaki mino, ntango  
 bakataki likambo ya babúngi,  
 Balelaki na mabángá pe na ba-ngomba,  
 (Lokola Yisalaele, ntango bazóngaki na  
 engumba, na Témpele.)  
 Babóndelaki, kasi mabóndeli na bango  
 ekómaki mpenza sima na ntango. (Basiliki  
 koboya Nsango.)

<sup>137</sup> Oh, ndeko, komeka ata moke te kosala yango. Ata ozali  
 kosala nini, kangámá ngwi na ntina-ya-likambo! Iyo, misie!

<sup>138</sup> Sikawa, kino tókutana lisusu, tokosala boye:

Memá Nkombo na Yesu,  
 Lokola nguba liboso na motámbo nyonso;  
 Ntango masenginia mazingi yo, (Okosala nini?)  
 Lobá Nkombo mosantu wana na libondeli.  
 Nkombo kitoko, O ya boboto!  
 Elikia ya mokili pe esengo ya Lola;  
 Nkombo kitoko, O ya boboto!  
 Elikia ya mokili pe esengo ya Lola.

<sup>139</sup> Tógumba mitó sikawa, wana tozali koyémba na nsé ya  
 mongongo:

Tokogúmbama liboso na Nkombo na Yesu,  
 Tokofukama na makolo na Ye,  
 Mokonzi na Bakonzi na Lola...kolatisa Ye  
 motole,  
 Ntango mobembo na biso ekosila. (Ekozala,  
 mokolo moko.)  
 O Nkombo kitoko, Nkombo kitoko, O ya  
 boboto!

Kino tókutana lisusu, Nzambe ázala na bino.

Elikia ya mokili pe esengo ya Lola;  
 Nkombo kitoko, O ya boboto! Ya boboto!  
 Elikia ya mokili pe esengo ya Lola.



*NTANGO YA KOSANGANA PE ELEMBO NA YANGO* LIN63-0818  
(The Uniting Time And Sign)

Liteya oyo ya Ndeko William Marrion Branham, eteyamaki liboso na Ngelesa mokolo mwa lomingo na mpokwa, mokolo mwa 18, sanza ya mwambe, na mobu 1963, na Branham Tabernacle, na Jeffersonville, Indiana, U.S.A., ekamatamaki uta na bande pe ekomamaki mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2017 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)



## Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)